



lech den Zukunftspak vun der Regierung virstellt, an dëst Dokument geet jo och quoesch duerch eng ganz Rëtsch Kommissiounen. A gëschter hunn awer just d'Membere vun der Finanzkommissioun eng Pabeiversioun vum Budget ausgedeelt kritt.

A mir wéisste gären, ob et net opportun gewiescht wier, fir de Budget no der Sitzung prett gehat ze hunn, zumindest fir déi Deputéiert, déi gären eng Pabeiversioun matgehall hätten.

Merci.

► **M. Mars Di Bartolomeo, Président.** - Merci der Madame Aehm. D'Wuert huet direkt de Finanzminister, den Här Pierre Gramegna.

► **M. Pierre Gramegna, Ministre des Finances.** - Här President, Dir Dammen an Dir Hären, ech sinn da weinst där Urgence heihinnerkomm, fir dann op déi Fro ze äntwerten. Mir hunn, wéi mer décidéiert hunn, dass mer géifen de Budget op en USB-Stick setzen, eis d'Fro gestallt, ob dat konform wier oder net, well mer effektiv dat nogelies hunn. Dat ass emol dat Alleréischst.

Dat Zweet: Dir frot mech, wat ech vun der Interpretatioun vum Reglement vun der Chambre des Députés halen. Et ass net u mir...

**(Interruption)**

Ech sinn net fäerdeg. Ech sinn net fäerdeg!

► **M. Mars Di Bartolomeo, Président.** - Hei huet just een d'Wuert. A virdrun hat och just een d'Wuert, dat war de Froesteller. An elo huet den d'Wuert, den drop äntwert. An ech géif lech da bieden, gutt nozelauschteren, wann ech gelift. Dat géllt och fir den Här Reding!

► **M. Pierre Gramegna, Ministre des Finances.** - Ech mengen, d'Madame Aehm huet jo och esou d'Fro gestallt, ob mir mengen - ob mir mengen -, dass dat konform zum Reglement vun der Chamber ass. An ech soen lech: Dir sidd zoustänneg, fir Aert Reglement ze interpretéieren, net ech! Ech maachen do keng Immixtioun.

Den drëtte Punkt: Well mer awer gesinn hunn, dass den Text a sengem Wortlaut e puer Interpretatiounen zouléisst, hat ech Kontakt mam President vun der Chambre des Députés an hunn him gesot, well hei vun „imprimés“ rieds geet, loosse mer eng kleng Quantitéit a Pabeiversioun maachen, par courtoisie.

Véierte Punkt: De Gesetzestext, den hei steet, dee schwätzt vun alleguerten de Gesetzter, dee mécht keng Distinction tëschen engem Gesetz fir de Budget oder engem anere Gesetz. An et ass esou, dass mir nach ëmmer dovunner ausgaange sinn, Dir alleguerten och, dass vun all Projet de loi, dass Der do eng Versioun am Pabeier kritt, an dann ass et d'Responsabilitéit vun der Chamber, fir d'Distribution ze maachen.

Dofir schwätzen ech vu Courtoisie, well effektiv, wat d'Budgetgesetz ubelaangt, et eng Gewunnecht war, dass mer der ganz vill gedréckt hunn an dass mer déi effektiv der Chamber, an net nëmmen der Chamber, zur Verfügung gestallt hunn.

Elo ass et esou, dass mer schonn d'lescht Joer d'Zuel vun den Exemplairen, déi mer drécke gelooss hunn, staark reduzéiert hunn. 2013 sinn nach 2.300 Exemplaire gedréckt ginn, 2.300 Exemplaire vun där Zill. An dat huet kascht: 18.303 Euro, 2013. D'lescht Joer si mer, wéi gesot, op 250 Exemplaire erfogaangen. Do huet et eis nach just 6.880 Euro kascht.

Dëst Joer hu mer jo fonnt, dass mer missten d'Technologë vun dësem Jorhonnert gebrauchen. Dofir hu mer den USB-Stick maache gelooss, an zwar zu engem Käschtepunkt, den am Total fir dat Ganzt, fir déi véier Volummen, 2.374 Euro kascht huet. A mir hunn...

Entschëllegt, an da kënn nach derbäi..., entschëllegt, ech hu mech elo geiert! Dat huet 1.653 Euro kascht, déi USB-Sticken. Mir hunn der 250 gemaach, Käschtepunkt 1.653 Euro. A mir hunn, wéi gesot, 30 Exemplaire gedréckt fir 2.374, soudass den Total vum Coût dëst Joer ronn 4.000 Euro ass. Also och nach e gudde Strapp méi bëlleg wéi d'lescht Joer!

Ech wëll hei Folgendes nach ënnersträichen: Ech mengen, mir hunn eis extra vill Méi ginn dëst Joer, fir dass Transparenz do ass a fir vill Leit fir de Budget ze interesséieren, natierlech inklusiv déi, déi als Éischt interesséiert sinn, dat sidd Dir. Den USB-Stick fonctionnéiert gutt. Ech hunn en nach haut de Moie selwer getest. Ech muss soen, et ass en extrem effikass Instrument.

Ech ginn lech e Beispill. Wann Der wëllt erausfannen, wou ass an engem Article budgétaire dat Wuert „habillement“ dran, da maacht Der dat an de Moteur de recherche an da kritt Der alleguerten d'Artikelen am Budget, wou „habillement“ drasteet. Dat schéngt mer awer eng Method ze sinn, fir ze schaffen, déi méi effikass ass, wéi wann ee misst d'ganz Buch duerchkucken, fir ze fannen, wou „habillement“ drasteet.

A leschtens wollt ech nach soen, dass mer jo en Internetsite lancéiert hunn, den en ligne ass, wou een de Budget och erëm eng Kéier erëmfënnt a wou een interaktiv a mat dynamescher, mat moderner Technologie ka Saachen offroen, wéi zum Beispill: Wat sinn déi gréisst Dépense vum Stat? Wat sinn déi gréisst Dépenses an engem Ministère? Et dréckt een op ee Knäppchen an et huet een dat alles direkt!

Ech mengen, mir hunn alles gemaach, fir dass de Budget soll disponibel sinn als Informatioun fir d'Chambre des Députés, fir lech alleguerten, awer och fir de grand Public. A mir kréien och schonn Échoe vu Leit, déi sech freeën, dass een dat kann esou konsultéieren.

Dofir wollt ech lech just soen, dass mir mengen, dass mir dat Néidegt gemaach hunn. Wann allerdéngs elo eng Demande wier, fir méi Exemplaren ze drécken, da maache mir dat, Här President. Mä dat ass un lech ze décidéieren. Wann Der dat gären hätt, da kascht dat eben e puer Dausend Euro méi. Mir hu geschat, dat kéint tëschen 6.000 an 10.000 Euro méi kaschten, jee nodeem, wéi vill Exemplaren Der gären hätt. An da kascht dat déi Suen an der Beem, déi da mussen ëmgehae ginn.

► **Plusieurs voix.** - Très bien!

► **M. Pierre Gramegna, Ministre des Finances.** - Ech soen lech Merci.

► **M. Mars Di Bartolomeo, Président.** - Merci dem Här Finanzminister. Eis Prozedur gesäit net vir, dass een no enger Question parlementaire nach eng Kéier d'Wuert gëtt. Ech wëll just soen, dass et richtig ass, dass mer 25 Exemplare kritt hunn, nodeem mer der gentiment 100 gefrot haten. Mir géifen dat maachen, zu deem den Här Finanzminister eis opgefuerdert huet. Mir géifen em dann no dëser Sitzung Bescheid soen, wat mer nach zousätzlech brauchen. An ech soen em da Merci, dass mer déi och kréien. Merci.

Mir géifen dann zum nächste Punkt vum Orde du jour iwwergoen, dat ass de Projet de loi 6527 iwwert d'Organisation vun de Centres de recherche publics. D'Riedezäit ass nom Modell 1 festgeluecht an d'Wuert huet direkt de Rapporteur, den honorabelen Här Roger Negri.

#### 4. 6527 - Projet de loi

**1. ayant pour objet l'organisation des centres de recherche publics;**

**2. modifiant la loi modifiée du 4 décembre 1967 concernant l'impôt sur le revenu;**

**3. abrogeant la loi modifiée du 9 mars 1987 ayant pour objet 1. l'organisation de la recherche et du développement technologique dans le secteur public; 2. le transfert de technologie et la coopération scientifique et technique entre les entreprises et le secteur public;**  
**4. abrogeant la loi du 10 novembre 1989 portant création d'un Centre d'Études de Populations, de Pauvreté et de Politiques Socio-Économiques auprès du Ministre d'État**

**Rapport de la Commission de l'Enseignement supérieur, de la Recherche, des Médias, des Communications et de l'Espace**

► **M. Roger Negri (LSAP), rapporteur.** - Merci, Här President. Här President, Dir Dammen an Dir Hären, d'wëssenschaftlech Fuerschung soll ee vun de Kompetenzberäicher vu Lëtzebuerg ginn, eng nei zukunftsorientéiert Nisch mat beschter internationaler Reputatioun. Dofir muss mir eis aktuell Fuerschungsstrukturen nei opstellen. An dëst ass och den Haaptobjekt vum Projet de loi vun haut.

Nach virun net allze laanger Zäit hate mir de Rächtrum vun eise Land sengem Buedem, der Minette, ze verdanken. No der Stolkris an der Mëtt vun de 70er Joren huet Lëtzebuerg aner Wirtschaftsberäicher wéi de Bankesektor déelopéiert an déelopéiere missen, fir eis Liewensqualitéit op engem héijen Niveau ze halen.

Awer och sougenannt „Kompetenznischen“ sinn definéiert a weiderentwéckelt ginn, wéi ënner anerem mat groussm Succès de Satellitberäich. An och haut, wéi säit méi wéi 25

Joer, sinn d'politesch Décideure vun deene successive Regierunge weiderhin der Meinung, dass de wirtschaftleche Rächtrum an d'sozial Kohäsioun nëmmen erreecht kënne ginn, wa Lëtzebuerg op Kompetenznische setzt.

An dësem Sënn huet d'ëffentlech wëssenschaftlech Fuerschung an deene leschten zéng Joer hei zu Lëtzebuerg en Opschwung erlieft, wéi e bis elo nach net do war. Fuerschung an Innovation schafen héichwäerteg Aarbechtsplazen an droen domat hiren Deel zur Lutte géint de Chômage bäi.

Mam Fuerschungsgesetz vum 9. Mäerz 1987 iwwert d'Recherche publique als Loi-cadre goufen eng éischte Kéier d'Centres de recherche publics, d'CRPen, per Règlement grand-ducal geschafen. Doropshi si folgend Entitéiten entstanen: éischstens, 1987 de CRP Gabriel Lippmann oder, anescht gesot, de CRP Centre universitaire, den 1999 an Erënnerung un den éischten Nobelpräisträger, den zu Lëtzebuerg gebuer gouf, a CRP Gabriel Lippmann ëmbenannt ginn ass. Zweete war 1987 och de CRP Henri Tudor, den an Erënnerung un de Lëtzeburger Ingenieur an Erfinder am Beräich vun den Electrogénérateuren als CRP um Institut Supérieur de Technologie, IST, dunn an d'Liewe geruff gouf.

Béid CRPe fuerschen an den Ëmwelt- an an den Agrobiotechnologien, de Materialwëssenschaft souwéi de Gesondheets- an de Kommunikationstechnologien, woubäi ouni ze generaliséieren de CRP Lippmann méi an der Grondlagefuerschung an de CRP Tudor méi an der Recherche appliquée fir d'Betriber schafft.

Als Fallbeispiller kann ee vum CRP Tudor de Projet PILLS uféieren, deem säin Objektiv et ass, nei Léisungen ze fannen, fir d'Effete vu Medikamentéreckstänn op d'Qualitéit vum Uewerflächewaasser maximal ze reduzéieren, an dann en anert Beispill vum CRP Lippmann, d'Entwécklung vun Nanoparticullen am Beräich vum Génie des nanomatériaux, déi et erlaben, e Medikamentcocktail geziilt an eng Kribszell ze transportéieren.

Drëtt Entitéit war 1988 op darselwechter Basis de CRP-Santé als Deel vum nationale Gesondheetslabo. Hire Beräich läit an der Erfuerschung vun de Mechanisme vu Krankheeten, der Epidemiologie, der Diagnostik an der Behandlung vu mënschleche Kriibs-, kardiovaskulären oder infektiöse Krankheeten.

Véiertens ass 1989 de CEPS, de Centre d'Études de Populations, de Pauvreté et de Politiques Socio-Économiques am Statsministère, op Basis vun enger Loi organique sui generis geschafe ginn. De CEPS fuerscht am sozialwëssenschaftleche Beräich a befaasst sech mat Studien, zum Beispill iwwert d'Nohaltegkeet vun eise Pensionssystem, d'Effikassitéit vun de Mesuren um Aarbechtsmarché, fir d'Entscheidung vum Stat an de sozioekonomeschen Acteuren ze ënnerstëtzen.

Fënneft a lescht Entitéit war 2008 d'IBBL, Integrated Biobank of Luxembourg, d'IBBL ass geschafe gi mat engem notariellen Akt ënnert der Forme juridique vun enger Fondatioun. Den Objet vun der Biobank ass ënner anerem, Échantillone vu Blut, Urin, Serum a biologeschen Tissueen ze stockéieren an ze analyséieren an op dësem Wee national a virun allem international Fuerschungsprojete wëssenschaftlech an technologesch ze ënnerstëtzen.

Grënnungsmembere vun der IBBL waren déi dräi CRPe Santé, Lippmann an Tudor an d'Uni Lëtzebuerg. Eng éischt pluriannuell Konvention gouf 2009 ënnerschríwwen. Mat dëser Konvention huet de Stat der IBBL eng finanziell Ënnerstëtzung vu 55 Milliounen Euro zougeséichert. Nieft der Obligatioun fir d'IBBL, Drëttmëttel an Héicht vun acht Milliounen Euro ze beschafen, fixéiert d'Konvention nach eng gewëssen Zuel vun operationellen Objektiv, déi d'Biobank erreeche muss.

Här President, déi am Joer 2000 lancéiert Lissabon-Strategie hat zum Zil, bis 2010 aus der Europäescher Unioun déi kompetitiivist an dynameschst Wirtschaft vun Wëssen ze maachen. Am Kader vun dëser Strategie sollten d'Investisementer an de Beräicher Research and Development, R&D, bis 2010 op 3% vum Bruttoinlandsprodukt, dem PIB, klammen, eng Zilsetzung, déi europawäit net erreecht gouf - Lëtzebuerg ass bis op 1,66% komm - an 2010 an där neier Strategie „Europa 2020“ fir Wuessstum a Beschäftigung nach eemol dowéinst widerholl gouf.

Doropshin huet d'Lëtzeburger Regierung 2010 décidéiert, fir bis d'Joer 2020 d'Intensitéit am Beräich Recherche bis op 2,3% respektiv 2,6% vum PIB ze steigern. Dës Entscheedung ass trotz alle budgetäre Constraint geholl ginn, well spéitstens säit der Finanz- an der Wirtschaftskris ab 2008 erëm ganz kloer ginn ass, dass Lëtzebuerg duerch eng ekonomesch Diversifikatioun seng Ofhängegkeet vum Finanzsektor reduzéiere muss. Nei Méiglechkeete

schaaft een nëmmen, wann een nei Iddien huet.

De Budget vum Stat fir de Beräich RDI, also Recherche, Développement an Innovation, ass an deene leschte 14 Joer sougutt fir den ëffentleche wéi fir de private Secteur konstant an d'Luucht gaangen, vun 28 Milliounen Euro am Joer 2000, dat waren 0,13% vum PIB, op 210 Milliounen (veuillez lire: 310 Milliounen) fir dëst Joer, dat sinn 0,65% vum PIB, an dat Ganzt mat 6.000 héichwäertegen Aarbechtsplazen! Et geet also hei och ëm vill Aarbechtsplazen.

Déi ëffentlech budgetär Kreditte fir d'CRPen hirersäits si vun 8,4 Milliounen Euro am Joer 2000 op 68 Milliounen am Joer 2013, an d'Personal vun de CRPen ass vu 719 Beschäftegter am Joer 2008 op 1.076 am Joer 2013 eropgaangen. All dës Entwécklung weisen de Wëlle vun der Regierung, fir an d'Fuerschung ze investéieren an dorausser eng nohalteg Politik fir d'Entwécklung an d'Diversifikatioun vun eise Land ze maachen.

An der Suerg, d'Lissabon-Strategie effikass ëmzesetzen, huet d'Regierung 2005 décidéiert, d'OECD mat enger Analys vum Lëtzeburger Fuerschungssektor ze beoptragen. Den Akzent sollt dobäi op déi ëffentlech Fuerschung geluecht ginn. Dëse Rapport huet, fir d'Gouvernance vum System ze verbessern, ënner anere virgeschloen, sougenannt „contrats de performance“ tëschen der Regierung an deene verschiddenen Acteuren an der Recherche anzeféieren. Och sollte méi kloer Prioritéiten am Fuerschungsberäich gesat ginn, andeems een d'Aktivitéiten op eng gewëssen Zuel vun Domäne limitéiert.

D'Konklusiounen vun dësem Rapport goufe vun allen Acteuren diskutéiert. An 2006 huet d'Chamber eng Motioun gestëmmt, mat där d'Regierung opgefuerdert gouf, dës Recommandatiounen ëmzesetzen. D'Joren 2006 bis 2008 goufe genotzt, fir d'Haaptrecommandatiounen vum Rapport ëmzesetzen.

Trotz de ville Succès vun de CRPe Lippmann an Tudor, déi net ze leegre sinn, huet eng Evaluatioun, déi op Demande vum Héichschoul- a Fuerschungsministère an deene leschten dräi Joer gemaach gouf, gewisen, dass et gewësse Schwäche géif ginn, virun allem a Saachen Iwwerschneidung vu Fuerschungsaktivitéiten, engem Feelen u Masse critique, vun engem Feelen u internationaler Visibilitéit an engem Feelen vun enger zefriddestellender strategescher Concertatioun.

D'CRPen hu sécher hir Friichte gedroen. Elo ass awer den Zäitpunkt komm, fir dës Pionéierzäit ze verlossen an d'CRPen am europäeschen an internationale Kontext vu Fuerschung an Innovation ze konsolidéieren.

Här President, domadder kommen ech zu den Hauptëmännerungen am Gesetz vun haut par rapport zum Gesetz vun 1987, an déi ginn op véier Niveaue virgeholl: éischstens beim Statut, zweetens bei de Missiounen, drëtten, éischte Punkt: bei de verschiddenen Organer, zweete Punkt dovun: bei hirer Gouvernance; an als véierten a leschte Punkt, um Niveau vum Personal.

Ugefaange beim Statut vun de CRPen, gëtt elo dorausser offiziell en Établissement public, an dëst per Gesetz an net méi wéi virdrun iwwer Règlement grand-ducal, an dëst konform zur Constitutioun, nom Artikel 108bis.

Mä et ass selbstverständlech, dass Autonomie a Responsabilitéit zesummeginn. Dëse Projet de loi hält fest, dass d'Relatiounen tëschen dem CRP an dem Stat duerch eng pluriannuell Konvention regéiert ginn, déi engersäits generell d'Politik vum CRP betrëfft, seng strategesch Choixen, seng Aktivitéite genau wéi seng Objektiv, an anerersäits d'Mëttelen, déi de Stat op Basis vun deene gültige budgetäre Prozeduren zur Verfügung stellt.

E CRP, den eng Autonomie genéisst, muss an aller Transparenz handele kënnen an och Rechenschaft doriwwer offeeë kënnen. An dësem Kader gëtt d'Praxis vun den externen Evaluatiounen, déi hir Preuvë gemaach hunn, bäibehalen a konsequenterweis am Projet de loi och elo verankert.

Esou solle mat dësem Projet de loi CRPe geschafe ginn, déi den Exigence vun der moderner Fuerschung- an Innovationswelt gerecht ginn an déi capabel sinn, hir Prioritéite genauestens ze bestëmmen an awer och flexibel genuch sinn, fir hir Fuerschung schnell un déi national an déi international gesellschaftlech an ekonomesch Entwécklungen unzepassen.

Et ass deemno evident, dass d'CRPen net an all Beräich eng Exzellenz erreeche kënnen, a si mussen, fir den Ufuerderung vun der gréisstméiglecher Qualitéit gerecht ze ginn, Prioritéite festleeën an hir Choixen maachen.

D'Relatiounen mam Stat ginn iwwer pluriannuell Konventionen geregelt a Form vu Contrats de





performance - aktuell couvréiere se d'Period, mir haten de Mëtteg nach eng Réunionioun do-riwwer, vun 2013 bis 2017 -, déi mat den dräi CRPe Lippmann, Tudor, Santé, dem CEPS, dem Fonds national de la recherche, der BioBank-IBBL a Luxinnovation ofgeschloss ginn. Hei-madder engagéiere sech d'Vetragspartner, eng gewëssen Zuel vu konkrete finanziellen a strukturellen Objektiver a Resultater am Gé-genzuch zu der staatlecher Dotatioun ze er-reechen. Op dës Manéier ginn d'Fuerschungsausgaben an eng zilorientéiert Relatioun gesat zu den erwaarte Resultater, an dat um wëssen-schaftlechen, ekonomeschen an och soziale Plang.

Zu de finanzielle Ressourcë leet d'Gesetz am Detail fest, wat de CRPen zousteet. Zu dësen zielen ënner anerem d'Kontributioun vum Stat aus dem Statsbudget, déi finanziell Ënner-stützung aus Konventiounen oder fir national oder international Fuerschungsprojeten, d'Re-venuen aus kontraktuelle Fuerschungsaarbechten oder Donen an Ierfschaften.

Schliisslech gëtt duerch dat neit Gesetz och nach d'Kollaboratioun vun de CRPe mat aneren Etablissementer, wéi zum Beispill och mat der Uni Lëtzebuerg, geregelt. Esou solle sech d'CR-Pen a Saache Fuerschungspolitik a Recherche-aktivitéite mat der Uni Lëtzebuerg beroden a Kollaboratiounen gi kontraktuell geregelt.

Zweete Punkt vum Projet, dat sinn d'Missiounen vun de CRPen, si sinn aus dem Gesetz vun 1987 am virleiende Projet iwwerholl a prezi-séiert ginn. Hir primär Missioun, d'Fuer-schungsaktivitéite selbstverständlech, gëtt duerch dat neit Gesetz verstärkt. Esou kann dës Missioun punktuell Projeten am Beräich vun der Grondlagefuerschung enthalten, mä d'Prioritéit vun de CRPe soll d'Recherche appli-quée en faveur vun der sozioekonomescher Entwécklung vum Land sinn.

Anerersäits kréien d'CRPen duerch de virleiende Projet de loi weider zousätzlech Missiounen. Dat sinn d'Förderung vun der Aus- a Weiderbil-dung vun hirem Personal, besonnesch vu jonke Chercheuren, des Weideren d'Definitiou, d'Ëmsetzung an d'Evaluatioun vun den natio-nale Politicken an de genannte Beräicher.

Wat déi verschidden Organer - als drëtte Punkt vun der Ernennung vum Gesetz - ugeet, esou ginn et der an Zukunft dräi, an zwar nëmme méi CRPen, an net wéi bis elo déi virdrun uge-schwate fënnef Entitéiten. Déi éischt dovun, de CRP Henri Tudor an de CRP Gabriel Lippmann, ginn zesummegefouert, well se, wéi gesot, an deeneselwechte Beräicher fuerschen, an dat ab dem 1. Januar 2015, ënnert dem gemeinsamen Numm „Luxembourg Institute of Science and Technology“, kuerz LIST genannt.

Zweetens, d'IBBL gëtt an de CRP-Santé inte-gréiert, deen zukünfteg „Luxembourg Institute of Health“, LIH, heescht. Eng Nuance zu dëser Regel gëtt awer agefouert am Zesummenhang mat der Integratioun vun der IBBL an de CRP-Santé. 2012 huet misse festgestallt ginn, dass d'IBBL de Financement tiers, esou wéi en an der pluriannueller Konventioun virgesi war, net erreecht huet, an dass d'BioBank och wahr-scheinlech an deenen nächste Joren zu grou-sen Deeler vum öffentleche Finanzement wäert ofhänken.

Aus dësem Grond ass déi juristesche Form vun der Fondatioun IBBL net méi déi richteg. Am Projet de loi ass dofir virgesinn, d'IBBL an de CRP-Santé, den zukünftigen LIH, ze integréieren. D'IBBL soll awer de Statut vun enger kloer definéierter Struktur kréien, mat enger gewës-sener Autonomie, déi sech ënner anerem aus-dréckt duerch eng eege pluriannuell Konven-tioun, also eegen, separat finanziell Moyenen an eng autonom, also vum Generaldirekter vum LIH onofhängeg Direktioun, woubäi d'IBBL awer direkt ënnert der Tutelle vum Ver-waltungsrot vum neien LIH wäert fonctionnéieren.

Dës Organisatioun gëtt der BioBank déi fir hire Geschäftsmodell néideg Onofhängegkeet a ga-rantéiert gläichzäiteg d'Confidentialitééit vun allen Échantillonen. De Projet de loi erlaabt och, le cas échéant, den Transfert vun den Akti-vitéite vun der IBBL an eng nei juristesche Struktur vum Typ „spin-off“.

Schliisslech erlaabt dës Organisatioun eng gutt, einfach an ekonomesch gönschteg Léisung fir den zentrale Stockage vun Échantillone fir d'Besoinen vun der nationaler Fuerschung a gläichzäiteg ënnerstëtzt d'BioBank domat am LIH nach déi wëssenschaftlech Aarbecht fir d'Santé publique. D'IBBL bleift deemno eng In-frastruktur am Dénegsch vum der öffentlecher Fuerschung a vun den Entrepreneuren.

Deen drëtten a leschte CRP ass dann de CEPS, deen ëmbeenannt gëtt an „Luxembourg Insti-tute of Socio-Economic Research“, kuerz LISER. Deemno gëtt et an Zukunft zu Lëtzebuerg dräi CRPen: LIST, LIH a LISER. Esou gëtt en homo-geent Bild vun der öffentlecher Fuerschung an

en direkte Lien zu Lëtzebuerg domat gescha-fen, wat duerch déi engleschsproocheg Déno-minatioun méi assimilabel ass a virun allem dat um internationale Plang domadder gëtt.

Zur Gouvernance vun den dräi CRPen ass ze soen, dass d'Regierung zwar duerch déi schonn ugeschwate Contrats de performance um Ent-scheidungsprozess bedeelegt bleift, dass d'CR-Pen d'Strategie vun hirer Verwaltung an hir zukünfteg Evolutioun awer selwer maachen an autonom bleiwen. Dës Approche, déi d'Auto-nomie vun de CRPe stäerkt, bréngt mat sech, dass d'Zesummesetzung vum Conseil d'admini-stration a seng Attributiounen genau wéi de Rôle vun de verschiddenen Organer an de CR-Pen an deem neie Gesetz och nei geuerdnet ginn.

An dësem Sënn besteet de Conseil d'admini-stration vun engem CRP zukünfteg nëmme méi aus externe Persounen. D'Membere ginn zu-künfteg nach just op Basis vun hire Kompe-tenzen an hirer Erfahrung ausgewielt. Fir de bessere Fonctionnement gëtt d'Zuel vun de Membere vun zéng op néng erofgesat an déi automatesch Representatioun vu verschiddene Ministeren am Conseil d'administration gëtt of-geschaaft. D'Membere ginn op Propositioun vun der Regierung fir eng Period vu fënnef Joer bestëmmt, an dat begrenzt op maximal zwou Mandatsperioden.

D'Fonction vum Commissaire du Gouverne-ment allerdéngs gëtt bäibehale mat Voix consultative. De Regierungskommissär huet en Informations- a Kontrollrecht an iwwer-waacht, ob d'Gesetzer an déi staatlech Konven-tiounen agehale ginn.

Zukünfteg besteet dem Conseil d'administra-tion, an deem iwwregens kee Geschlecht mat manner wéi 40% dierf representéiert ginn - Sexe sous-représenté mindestens also 40% -, besteet dem Verwaltungsrot seng Haaptaufgab net méi doranner, Entscheedungen iwwert d'Gestioun ze huelen, mä vill méi an der Defi-nitioun vun der genereller Politik an der Strate-gie vum CRP, an dat am Kader vun de pluri-an-nuelle Konventiounen an deenen doran defi-néierten Objektiver.

De Generaldirekter vum CRP sengersäits ass de Chef vun der Exekutiv, CEO. Hien dirigéiert de CRP an ass responsabel fir déi néideg Kohä-renz. Seng Aufgab ass et, déi vum Conseil d'administration definéiert Strategie ëmzeset-zen an all Décisiounen am Zesummenhang mat der couranter dagdeeglecher Gestioun vum CRP ze huelen. Seng Roll gëtt mat deem neie Gesetz ganz daitlech gestärkt par rapport zum viregte Gesetz.

Eng Ausnahm zu den übleche Besetzungen an de Conseils d'administration ass, dass am Ver-waltungsrot vum CRP-Santé ee Member op Propositioun vun der Regierung vum Wirt-schaftsministère genannt gëtt (veuillez lire: ee Member vun der Regierung op Propositioun vum Wirtschaftsminister genannt gëtt).

D'CRPe kréien do derniewent och en neit kon-sultatiivt Organ, de Conseil de concertation. An dëse Bairo, am Contraire zum Conseil d'admini-stration, besteet nëmmen aus interne Per-sonne vun de CRPen, a seng Aufgab besteet an der Ausaarbechtung vu konsultativen Avisa fir de Conseil d'administration, virun allem iwwert d'Ausaarbechtung vun de pluriannuelle Kon-ventiounen mam Stat. De Conseil de concerta-tion besteet aus aacht Persounen, dat si fënnef Chercheuren an dräi Personalvertrieder.

An domat kommen ech zum leschte Punkt vun der neier Organisatioun vun de CRPen, dat ass d'Personal. D'Personal gëtt duerch privatrecht-lech Aarbechtskontrakter beim CRP beschäf-tegt, woubäi dee jeeweilege CRP säin eegene System fir d'Gestioun vun de Carrièren organi-séiere muss an d'Konditiounen fir de Rekrute-ment an d'Promotioun vum Personal definéiere muss. Och gëtt mat deem neie Gesetz eng Per-sonaldelegatioun entspreichend dem Code du Travail agefouert, där hir Aufgab et ass, d'Inter-essen an d'Aarbechtskonditiounen vun de Sala-riéren ze verdeedegen.

An och wann déi fir d'Qualitéit vun der Re-cherche och an Zukunft bäizebehalen an op in-ternationalem Niveau nach ze steigern sinn, werfen den ugeschwate Regruppement vum CRP Gabriel Lippmann a CRP Henri Tudor an déi ugeschwaten Integratioun vun der IBBL an de CRP-Santé, dës Neierungen, déi organisato-resch, strategesch an ekonomesch sënnavoll sinn, bei ville Leit, déi bei dëse CRPe schaffen, awer och Froen op a maachen hinne vill Suer-gen.

Esou stellt sech zum Beispill beim neie CRP-LIST d'Fro vum Organigramm, vun der Verdeelung vun den Aufgaben. Sécherlech wäerten Depar-tementer zesummegeluecht ginn an anerer awer och zougemaach ginn, an net all Aar-bechter, Mataarbechter wäert opgrond vu sen-ger Spezialisatioun ouni Weideres op eng aner Plaz kënnen versat ginn.

Eng aner Fro...

► **M. Mars Di Bartolomeo, Président.**- Dir misst esou lues zur Konkusioun kommen.

► **M. Roger Negri (LSAP), rapporteur.**- Jo, Här President, ech hunn nach fir zwou Minuten.

Eng aner Fro ass déi vun de Standuerter: Wéini kommen déi zwee CRPe geografesch beie-neen? Och no der Fusioon wäert de CRP LIST nach op méi Sitte verdeelt bleiwen. Fir e schnellt an effikassst Zesummewuessen ass dat wahrscheinlech net ideal.

Bei der IBBL an dem CRP-Santé stellt sech d'Fro no der Grille vun de Gehälter. Schliisslech hunn déi zwee Etablissementer an dësem Punkt bis elo ganz ënnerschiddlech fonctionnéiert. Ech vertrauen do awer drop, dass d'Regierung der-fir suert, Här Statssekretär, dass hei mat deem néidege Fangerspëtzegefyll virgaange gëtt.

Dann, zur Propriété intellectuelle vun eisen öffentleche Fuerschungszentren ass ze soen, dass all den intellektuellen oder ekonomeschen Output aus engem Fuerschungsprojet d'Pro-priétéit vum CRP ass, ausser dëst gouf an enger spezieller Konventioun anescht geregelt.

D'Fonctionne vun de Chercheuren hirersäits ginn och genau festgeluecht. Si bestinn nie-went Fuerschungsaarbechten, dem Encadre-ment vun Theese vu Chercheuren, dem Aus-tausch mat de sozioekonomeschen Acteuren an der Zivilgesellschaft och am Enseignement an an der Formatioun vun neie Chercheuren.

D'Rechter an d'Flichte vun de Chercheure ginn an enger vum Conseil d'administration aus-geschaffter spezieller Charte du chercheur no de Recommandatiounen vun der Europäescher Kommissioun festgeluecht, déi de Chercheur mat senger Astellung akzeptéiert an ënner-schreift.

Här President, de Projet de loi iwwert déi nei Organisatioun vun de CRPe gouf de 14. Januar 2013 vun der viregter Regierung, vum Minister François Biltgen, an der Chamber deponéiert.

De Statsrot huet säin éischten Avis den 12. Juli 2013 ginn. An dësem huet en nach eng ganz Rei vu méi allgemengen a punktuellen Kriticken a Virschléi gemaach, iwwer ënner anerem d'Personal an d'Organisatioun, an och dräi Op-position-formellen ausgeschwat, déi d'Oplesch-tung vun de Propriétés immobilières engersäits, d'Fixatioun vun de Montante vun den Indem-nitéiten an de Jetone fir d'Membere vum Conseil d'administration an d'Definitiou vu gewësse supplementare Missiounen fir d'CRPen anerersäits betraff hunn.

D'Héichschoulkommissioun huet Amendemen-ter zum initiale Projet, déi haaptsächlech den Immobilien betraff hunn, den 20. November 2013 gemaach. Nodeems zwou vun den dräi Opposition-formellen direkt duerch dës Amen-dementer opgehuewe konnte ginn, huet de Statsrot a sengem Avis complémentaire den 20. Dezember 2013 seng Opposition formelle a Bezuch zu der Definitiou vun de supplemen-tare Missiounen widderholl. Nodeems dunno an der neier Legislaturperiod d'Kommissioun de 24. Abrëll 2014 insgesamt 31 Amendementer agereecht huet, huet de Statsrot den 11. Juli 2014 gréng Luucht fir de Projet ginn, an zwar an där Form, wéi ech en elo hei rapportéiert hunn.

Här President, wann Der erlaabt, géif ech nach just gären e puer Mercie lassginn, ganz kuerz.

► **M. Mars Di Bartolomeo, Président.**- Mä Dir sidd wäit iwwert d'Riedezäit ewech, och wann ech dann zur Kenntnis huelen, dass Der och den Accord wahrscheinlech vun der Frak-tioun bréngt, da spuere mer jo e ganze Koup Riedezäit an dofir, wann d'Chamber do dermat d'accord wär, géife mer dem Rapporteur nach Zäit ginn, fir Merci ze soen.

► **M. Roger Negri (LSAP), rapporteur.**- Da géif ech och lech, Här President, villmools Merci soen. Wéi gesot, ech géif och herno déi 23 Minuten, déi ech zegutt hunn, dann net ausnotzen, dofir géif ech lech Merci soen elo scho fir Är grouss Flexibilität.

Merci soe wëll ech all de Membere vun der zoustänneger Kommissioun, wou mer ëmmer ganz sachlech diskutéiert hunn, ënner eiser exzellenter Presidentin Simone Beissel.

(Brouhaha)

Jo, dat muss elo sinn.

E grouse Merci och der Madame Christiane Huberty, eiser Chamberkommissiounssekre-tärin, fir hir wierklech exzellente Aarbecht. Dem Minister Claude Meisch a sengem Statssekretär Marc Hansen an hire gudden Beroder aus dem Héichschoulministère, den Häre Pierre Decker a Léon Diederich, villmools Merci. De Responsa-bele vun deene verschiddene CRPen: den Damme Catherine Larue, Marie-Paule Hoff-mann, den Häre Marc Lemmer, Fernand Rei-nig, Jean-Claude Schmit an Hilmar Schneider, bei deenen ech als Rapporteur mat eise-m Mat-

aarbechter Tom Wenandy - och him e grouse Merci - am Summer sur place war fir jeeweils eng Entrevue, all hinne wëll ech e grouse Merci soe fir hir gutt a konstruktiv Zesammen-aarbecht!

Här President, als Konkusioun, a fir wierklech zum Schluss ze kommen, wëll ech zesumme-faassend soen, dass mer mat der neier Opstel-lung aus den aktuelle fënnef Entitéiten - Lipp-mann, Tudor, Santé, CEPS an IBBL - eriwuer zu den dräi neie CRPen - LIST, LIH a LISER - a Form vun dräi Etablissement-publicken haut legislativ d'Weiche stellen, fir ab dem 1. Januar 2015 international gutt positionéiert ze sinn am Beräich vun der Fuerschung als nohaltegen, zu-kunftsfaege Kompetenzzentren fir Lëtzebuerg.

An domat ginn ech den Accord vu menger Fraktioun zu dësem Projet de loi a soen lech Merci fir d'Nolauschteren.

► **Une voix.**- Bravo!

► **Une autre voix.**- Très bien!

► **Une troisième voix.**- Exzellente!

► **M. Mars Di Bartolomeo, Président.**- Merci dem Här Rapporteur, deen ech bieden, net méi esou erëmzekommen.

(Hilarité)

Als éischt Riednerin... A vu dass dann de Rap-porteur esou grousszügig vun der Chamber zousätzlech Riedezäit kritt huet, déi awer ze nuancéieren ass, géif ech dann och selbstver-ständlech, wann deen een oder aneren net eens gëtt mat senger Zäit, datselwecht uwen-den. Ech hoffen awer, dass mer eens ginn!

D'Madame Martine Hansen huet d'Wuert.

**Discussion générale**

► **Mme Martine Hansen (CSV).**- Merci, Här President. An ech kann lech garantéieren, ech ginn eens mat der Zäit an ech wäert se och net ausschöpfen.

An e grouse Merci un de Rapporteur, den Här Roger Negri!

► **Une voix.**- Aah!

► **Mme Martine Hansen (CSV).**- Et ass defi-nitiv elo schwéier nach eppes ze soen, wat net scho gesot ass. Ech wäert mech dann och zim-lech kuerz halen.

Här President, Dir Dammen an Dir Hären, viru genau 15 Wochen, den 2. Juli, hu mer hei op dëser Plaz d'Gesetz iwwert den FNR, de Fonds national de la recherche, gestëmmt. De Fonds national de la recherche stellt de Kader duer fir d'Recherche. Et ass e ganz wichteg Instrument vun der Recherche. Mä déi eigentlech Re-cherche gëtt awer an de CRPen an an der Uni gemaach.

Datt d'Recherche eis Matière première, eis éischt Ressource ass, déi eis d'Méiglechkeet gëtt, fir eis wirtschaftlech, gesellschaftlech a kulturell esou ze entwéckelen, wéi mer dat brauchen, ass zënter den 80er Jore vun der Re-gierung als solches unerkannt an och kon-sequent gefërdert ginn. D'Weiderentwécklung vum Fuerschungssektor - an domadder och d'Innovatioun - ass absolut noutwendeg, ass onëmgleichlech. Mir brauchen nei Standbeener fir d'Diversifizéierung vun eiser Economie.

D'CSV, déi bis d'lescht Joer d'Responsabilitéit an dësem Beräich hat, huet jorelaang hei op eng budgetär Prioritéit gepocht, an dat huet sech och rentéiert. Mat eise CRPen hu mer elo déi richteg Partner a mat dësem Gesetz kréie si och deen adequate legislative Kader.

Relativ fréi ass erkannt ginn, dass eng extern Evaluatioun vun dësem ekonomesch wichtige Sektor an och budgetär bedeiende Beräich onbedéngt noutwendeg an erfuorderlech wär. A genau dës Etüd - den Här Negri sot et och schonn -, déi vun der OCDE am Joer 2006 duerchgefouert gouf, ass den Ustouss ge-wiescht fir dëst neit Gesetz.

De Rapport vun der Etüd huet erginn, dass d'Gouvernance kéint verbessert ginn, d'Respon-sabilitéite vun den eenzelnen Acteuren méi ge-nau definéiert ginn an d'Koordinatioun tëschent deenen Acteuren sollt méi effizient gestalt ginn. Genau dës Punkten, déi an där Etüd erauskomm sinn, ginn an dësem Gesetzesprojet viséiert.

Ech hat et scho gesot, den Här Negri ass defini-tiv op all Detail an all Punkt agaangen. Ech wëll der awer dann e puer nach eemol ervirsträ-chen. Éischstens, d'Etüd vun der OCDE huet, esou wéi ech et gesot hunn, oder war den Ustouss fir dëst Gesetz. A well d'Evaluatioun fir all Beräich, net nëmme fir eis CRPe wichteg ass, mä fir all Betrib wichteg ass, ass och dës Eva-luatioun, extern Evaluatioun an dësem Gesetz festgehalen ginn.





Zweetens, de CEPS gëtt och elo e Centre de recherche public, de LISER, „Luxembourg Institute of Socio-Economic Research“, dee CRP, deen, wéi den Numm et seet, fir d'Recherche am sozioekonomesche Beräich verantwortlech ass, ee Beräich, dee mer definitiv fir dëst Land net dierfen ënnerschätzen.

D'CRPe Lippmann an Tudor fusionéieren an ee CRP, de LIST, den „Luxembourg Institute of Science and Technology“. An dee Wonsch vun der Fusioun war vun deenen zwee Acteurs schonns méi laang geäussert ginn. Mam LIST kréie mer och elo hei e performante CRP am Beräich vun den Technologien an der Science.

D'„Integrated BioBank of Luxembourg“ gëtt an de CRP-Santé integréiert a wäert zukünfteg LIH, „Luxembourg Institute of Health“, genannt ginn. A mat dësem CRP - ech mengen, d'Aktualitéit beweist et, et ass ee CRP, ee Beräich, deen onbedéngt noutwendeg ass, dee fundamental an eiser Gesellschaft ass, deen ëmmer wäert gebraucht ginn, dee sech permanent muss entwéckelen - kréie mer och elo hei e wichtegen Acteur, fir dës Recherche no vir ze bréngen.

► **Une voix.** - Très bien!

► **Mme Martine Hansen (CSV).** - Duerch de Regroupement vun eise CRPe gëtt elo d'Koordination verbessert, ginn d'Synergien besser genotzt a mir wäerten och eng besser Visibilitéit - Dir hutt et scho gesot - no bausse kréien, wat nach zousätzlech eben ënnerstrach gëtt duerch déi dräi d'selwecht opgebauten Nimm: „Luxembourg Institute of...“ an esou weider. Dat héiert sech vläicht op den éischte Bléck net onbedéngt esou ganz wichteg un, mä fir e klengt Land wéi Lëtzebuerg ass eng gutt international Visibilitéit extrem wichteg.

D'CRPe sinn, jiddweree fir sech, en Établissement public mat enger Autonomie juridique, financière, scientifique an administrative. Dës Autonomie op där enger Säit erfuerdert awer op där anerer Säit déi deemtsprechend Responsabilitéit. An duerch d'Instrument vun de pluriannuelle Konventionen, de sougenannten „contrats de performance“, déi vun der leschter Regierung scho gemaach gi si mat de CRPen an der Uni, ka séchergestallt ginn, datt d'Objektiver vun de CRPen erreecht respektiv agehale ginn.

Dann huet den Här Negri et och scho gesot: D'Gouvernance huet misse verbessert ginn, huet missen ugepasst ginn. D'Etüd huet dat erausbruecht. Op där enger Säit hu mer elo e Conseil d'administration. Deen hält déi allgemeng Politik fest, leet d'Strategie fest an d'Aktivitéiten vum CRP. Zousätzlech kontrolléiert en dës Aktivitéiten, an hie setzt sech zesummen - wéi gesot, dat ass nei - just nach aus externe Memberen, déi opgrond vun hire Kompetenzen an hirer Erfahrung an dësem Beräich ausgewielt ginn. Den Directeur général dann, dee féiert d'Décisionen vum Conseil d'administration duerch an hien assureiert am Prinzip déi deeglech Gestiouen a suergt fir de Funktionelement vum CRP.

Een zousätzlecht, wichtegt Gremium, dat sech aus CRP-interne Leit elo zesummesetzt, ass de Conseil de concertation. Dëst konsultatiivt Organ gëtt Avisen un de Conseil d'administration iwwert d'Politik vun der Recherche, der Entwécklung an der Innovation an awer och iwwert déi pluriannuell Konventionen, déi mam Stat gemaach ginn.

Ech mengen, mir hunn elo mat deem Conseil d'administration, dem Conseil de concertation, dem Directeur général a mam Commissaire du Gouvernement déi noutwendeg Basis, fir eng gutt Gouvernance vun de CRPen ze assureieren.

Ech wëll awer nach kuerz op d'Representation vun de Geschlechter an de verschiddene Conseilen agoen. Als CSV hate mer 30% fir dat manner representéiert Geschlecht virgesinn. Dir hutt dese Prozentsaz, esou wéi et an Ärem Regierungsprogramm steet, elo op 40% gehuewen, wat a priori net schlecht ass an ze begrëssen ass, awer sous condition, datt Der, esou wéi et am Gesetz festgeschriwwen ass, genuch kompetent Leit mat Erfahrung an dësem Beräich fannt. Ech wëll hei nach eemol drop hiweisen, esou wéi ech dat och beim Gesetz vun FNR gemaach hunn, datt dëst virun allem am Beräich vun de Sciencen an der Technologie net ëmmer evident ass, well ganz einfach an deem Beräich net esou vill Frae schaffen.

Ofschléissend wëll ech awer nach eemol ervirsträichen, datt d'CRPe sech am Laf vun der Zäit zu engem wierklech effizienten, absolut wichtigen an zuverlässigen Organ vun eiser Fuer-

schung an domadder vun der Entwécklung vun eiser Ekonomie entwéckelt hunn. Duerfir - ech gesinn, douewe sëtzen nach Leit vum Ministère - wëll ech u sech jiddwerengem vum Ministère, deen doru geschafft huet, awer och deene Leit aus de CRPe fir hiren Asaz Merci soen.

Mir sinn elo mat eisen dräi CRPen - dem LIST, dem LIH an dem LISER - gutt opgestallt, fir eis Recherche an de Beräicher vun der Science, der Technologie, der Gesondheet an dem sozioekonomesche Beräich nach weiderzeentwéckelen an, wéi gesot, wat ganz wichteg ass, fir d'Resultater vun eiser Recherche ze valoriséieren an eiser Ekonomie.

Ofschléissend ginn ech dann natierlech och den Accord vun der CSV-Fraktioun zu dësem Gesetzesprojet.

► **Plusieurs voix.** - Très bien!

► **M. Mars Di Bartolomeo, Président.** - Merci der Madame Hansen. Nächsten ageschriwwene Riedner ass den Här André Bauler.

► **M. André Bauler (DP).** - Merci, Här President. Dir Dammen an Dir Hären, haut ass e wichtegen Dag fir eis Lëtzebuurger Fuerschungslandschaft. Net nëmme well mer mam virleienenden Text eis CRPe besser opgestallt hunn, mä och well mer uschléissend dem Finanzement vum Lëtzebuurger Max-Planck-Institut eng legal Basis wäerte ginn. No der rezenter Reform vum Fonds national de la recherche sinn dës zwee weider wichteg Elementer, fir d'Zukunftsfäegkeet vun eise Fuerschungsstanduert ofzesécheren, e Fuerschungsstanduert, dee vläicht net op eng jorzéngteleang Tradition zréckkucken kann, mä dee sech och net brauch hannert der internationaler Konkurrenz ze verstoppen.

An der Vergaangenheet gouf Lëtzebuerg dacks op seng Bankeplaz reduziéiert. Et ass wichteg, datt d'Regierung et fäerdegbréngt, fir Lëtzebuerg als moderne Fuerschungsstanduert ze promouvieren, wou eng zukunftsorientéiert Fuerschung op engem héijem Niveau stattfënnt. An deene leschte Joren ass dat och gelongen, well mëttlerweil bréngen mer et fäerdeg, heizuland Topchercheuren ze rekrutieren. Mä och hei si mer eréischt um Ufank vun engem Parcours. An Zukunft muss mer et och fäerdegbréngen, Betriber op Lëtzebuerg unzeziehen, déi weinst eiser Recherche heihinner wëlle kommen.

D'Fuerschung kann a soll net weltfrem sinn. Si soll net an deem vill zitéierten „Elfenbeinturm“ stattfannen, neen, Fuerschung muss e Méiwäert, eng Plus-value fir eis Wirtschaft, fir eis Entrepreneuren, fir d'Liewen am Alldag, fir eis Gesellschaft duerstellen.

Den Impakt vun der Fuerschung gëtt also ëmmer méi wichteg. De Bierger muss gesinn, datt déi impressionnant Zomme vu Steiergelder, déi all Joer an d'Fuerschung investéiert ginn, och him direkt an indirekt zeguttkommen, sief et duerch d'Schafe vun neien Aarbechtsplazen oder sief et duerch Erkenntnisser, Resultater, déi dem Land a sengen Awunner hëllefen, Verbesserungen, wéi zum Beispill Verbesserungen am Schoulsystem ze maachen, oder nei Traitementer am Gesondheetsberäich.

Den Impakt vun der Fuerschung soll sech net exklusiv op ekonomesch Retombées beschränken, déi sécherlech e ganz wichtegen Deel sinn, mä méi breet ausfallen. Et muss een also och déi sozial a kulturell Aspekter vun der Fuerschung berücksichtegen.

Här President, wann een, wéi Lëtzebuerg, op eng Fuerschungsgeschicht vun nëmmen e bësse méi wéi engem Véirelsjorhonnert kann zréckblécken, da kann een ëmsou méi houlfreg sinn iwwert dat, wat an där kuerzer Zäit geschitt ass. Zemoos am Verglach mat anere Länner, déi wierklech doranner eng jorhonnerteleang Tradition hunn.

Eis Uni huet sech an hirer dach kuerzer Geschicht eng fest Plaz an der europäescher Fuerschungslandschaft eruewert a bréngt et fäerdeg, exzellent Fuerscher aus der ganzer Welt unzeziehen. Als Beispill kann een hei ënner anere de Laboratoire vum Rudi Balling, deen en Deel vun der grousser Biomedezinsinitiativ ass, déi am Joer 2008 gestart gouf, zitéieren.

Den Här Balling huet hei a ganz kuerzer Zäit e Laboratoire opgebaut, dee wäit iwwert d'Grenze vum Land bekannt ass. Esou konnt zum Beispill e Fuerscher aus der Equipe vum Här Balling sech géint e Fuerscher vun der renommierter Harvard University duerchsetzen fir e Projet am Beräich vun der Alzheimer-Fuerschung.

Eis Centres de recherche publics hu sech gutt entwéckelt a si fir eis Betriber a Verwaltunge mëttlerweil en incontournabele Partner. A genee ëm dës Centres geet et jo hei am virleienenden Text. Och wann een hir Geschicht duerch aus als eng Success Story ka bezeichnen, esou besteet dach awer e gewëssen Handlungs- a Reformbedarf. Meng Virriedner sinn dorop agaangen, ech wäert dat net méi maachen.

Am Kader vun der Lissabon-Strategie, déi ënner anere Promotioun an den Ausbau vun der europäescher Fuerschung virgesäit, hat d'Regierung 2005 d'OECD domadder beoptragt, fir eng Analys vun eise öffentliche Fuerschungsdispositif ze maachen. Et goug drëms, d'Stärkten an d'Schwächen ze identifizieren a Recommandatiounen auszuschaffen, déi et eis sollten erlaben, eis öffentliche Fuerschung besser opzustellen. E groussen Deel vun de Recommandatiounen vun der OECD ginn, wéi schonn énescht gesot, mat dësem Projet de loi ëmgesat. Si wäerten derzou bäidroen, datt eis CRPen hir exzellent Aarbecht aus der Vergaangenheet och an Zukunft kënnen weiderfeieren.

Här President, fir den zukünftegen Développement vun eiser Fuerschung ass et wichteg, datt et eng kloer Aufgabendeelung gëtt. Der Politik hir Roll soll der Meenung vun der DP no haaptsächlech doranner bestoen, fir der Fuerschung an de Chercheuren déi beschtméiglech Konditiounen ze bidden, fir datt sënnavoll a gutt Fuerschung an eise Land ka bedriwwen ginn. Dofir ass natierlech den Dialog tëschent der Politik an de Fuerscher néideg a sënnavoll.

Mä wichteg ass awer och, datt all Säit hir Autonomie behält. Et huet sech nämlech erweisen, datt déi Länner, deenen hir Fuerschungsinstitutionen eng staark Onofhängegkeet opweisen, e staarken Impakt op déi jeeweileg Wirtschaft a Gesellschaft hunn. Genee dat, nämlech eng verstärkten Autonomie, huet sech de virleiene Projet de loi als Zil gesat. Dëst gëllt iwwerengs och fir d'Reform vum FNR, iwwert déi mer virun der Summerpous hei am Haus debattéiert hunn.

Méi Autonomie heescht awer net, datt d'Fuerscher all Orchideefach nogoe kënnen. Hei kënn dann nees d'Politik an d'Spill. D'Relationen tëschent de Fuerschungsinstitutionen an dem Stat ginn duerch déi sougenannt „contrats de performance“ definéiert. Hei ginn d'Ziler vun de Fuerschungsdomänen definéiert an och am Kader vun enger Rumm festgeluecht. Innerhalb vun dëser Rumm sinn d'Institutionen an d'Fuerscher fräi, fir déi Projeten ze definieren, déi zu dësen Ziler bäidroen an domadder den Impakt vun der Fuerschung hei zu Lëtzebuerg kënnen verstärken.

Här President, als e Land mat enger jonker Fuerschungstraditioun a mat begrenztem Reservoir vun inlännesche Fuerscher si mir méi wéi aner Länner op gutt Fuerscher aus dem Ausland ugewisen. Dofir muss mer als Standuert besonnesch attraktiv sinn a bleiwen. Mä wat mécht dann eigentlech en attraktive Fuerschungsstanduert aus?

D'Attraktivitéit an der Fuerschung beschränkt sech sécher net nëmmen op appropriéiert Paien, mä virun allem op gutt Kaderbedéngungen. Wat fir eng Strukturen an Infrastruktur gëtt et an deem Land? Wéi gutt sinn d'Laboen ausgerüst? Wéi steet et ëm déi sozial Ofsécherung vun de Fuerscher? Gëtt et en interessante private Fuerschungssektor? Oder nach: Wéi gesäit déi politesch Ënnerstëtzung vun der Fuerschung aus?

Iwwert déi politesch Ënnerstëtzung vun der Fuerschung ginn et, esou mengen ech, hei zu Lëtzebuerg keng zweeërlee Meenungen. Dat beweist eleng schonn déi vu Joer zu Joer klammend finanziell öffentliche Ënnerstëtzung vun der Recherche. An an all deenen anere Punkten ass Lëtzebuerg och guer net esou schlecht a brauch sech net hanner Länner, déi deelweis, wéi gesot, op eng ganz laang Tradition zréckblécken, ze verstoppen.

Sécher ginn et och Aspekter, wou nach Verbesserungsbedarf besteet. Ech denken hei un d'Koordination, wou sécher nach Loft no uewen ass. Hei kënnen awer déi Gesetzesännerungen, iwwert déi mer haut hei diskutéieren respektiv déi mat der Reform vun FNR schonn ëmgesat goufen, e wichtige Schratt zu enger Verbesserung bäidroen.

Wou mir sécher och nach net eist ganz Potenzial ausgeschafft hunn, ass eis Participatioun an den europäesche Fuerschungsprogrammer. Mir mussen an Zukunft derfir suergen, datt eis Fuerschungsinstitutionen besser um „Horizont 2020“ participéieren, well dat eng eemoleg Chance, eng eemoleg Geleeënheet ass, fir a multilaterale Projekter - mat deene beschten aus Europa - Fuerschung ze bedriwwen. Dat erheicht op där enger Säit souwuel d'Visibilitéit vun der Recherche an op där anerer Säit dréit et och zu engem méi héijen Impakt vun der Fuerschung op eis Ekonomie an op d'sozial Kohäsion bái.

Här President, et ass immens wichteg, fir och a grad bei eiser Jugend den Appetit un de Wëssenschaften, den Naturwëssenschaften besonnesch, ze erwächen. Fir Lëtzebuerg leien d'Resourcen nun eemol an de Käpp vu sengen Awunner. Mir mussen dofir méi jugendlecher derzou beweegt kréien, fir driwwer nozedenken, eng wëssenschaftlech oder technesch,

technologesch Disziplin ze studéieren an och esou eng Carrière anzeschloen. Schliisslech ka keng Fuerschung ouni Fuerscher funktionéieren.

Et kann net sinn, datt mer e Fuerschungsstanduert opbauen a mer bal keng Lëtzebuurger Chercheuren hei erëmfannen. Am Ausland wier dat ondenkbar. Mir brauchen also an dësem Kontext eng nei Mentalitéit. Wéi fréier de Bankesektor sech rasant entwéckelt huet, war de Reflex bei ville jonke Leit deen, fir Ekonomie a Finanzen ze studéieren. Haut wësse mer, datt dat net méi an alle Fäll eng Garantie fir eng interessant a fir eng sécher Aarbechtsplaz ass.

Mir hu mëttlerweil e chronesch Defizit u Leit, déi Naturwëssenschaften, Mathematik oder Ingenieurswëssenschaften studéieren. Och am ICT-Beräich feelt et dättelech u Fachkräften. Dогéint hu mer en Iwwerschoss an de Geschichtswëssenschaften, mat 500 Studenten, déi ënnerwee sinn, oder an der Psycho, mat 800 Studenten.

Et ass also och eng Erausforderung vun der Schoul, fir derfir ze suergen, datt méi jonk Mënschen an déi Richtung studéieren ginn, wou och Leit gebraucht ginn a wou mer amgaange sinn, en neie Crénau vun eiser Wirtschaft opzebauen. Hei muss also a Saachen Informatioun, Orientéierung a Basisformatioun nogebessert ginn. An et muss versicht ginn, deene Jonken d'Angscht virun esou engem Studium ewechzehuelen. Hei stellt sech also och e klere pädagogeschen an didakteschen Défi an eise Lycéien.

Den FNR ënnerstëtzt d'Promotioun vun der Culture scientifique mat enger Retsch vun Instrumenter. Denke mer un den „Mister Science“, un den „Pisa-Wëssensmagazin“, un d'Aktioun „Chercheurs à l'école“ - och den „natur musée“ spillt hei eng net onwesentlech a wichteg Roll. Mir mussen onbedéngt op dësem Wee weidergoen a jonk Leit op esou Berufler esou fréi wéi méiglech zolidd virbereeden, se sensibiliséieren a se mobiliséieren. Dofir ass et gutt, datt Héichschoulministère a Schoulministère ënnert der Verantwortung vun deem nämlechte Minister stinn.

Här President, wéi uganks vu menger Ried scho gesot, stelle mir haut d'Weiche fir d'Zukunft vun der öffentlecher Fuerschung zu Lëtzebuerg. Wa viru méi wéi engem Jorhonnert eis wichtigst Ressource de Minerai de fer, d'Eisenäerz am Minette war, dann ass et mat Sécherheet fir déi nächst Joren a Jorzéngten d'Wësse vun eisen Awunner. D'Fuerschung, egal ob privat oder öffentliche, hiert Abannen an eis Ekonomie, wäert eent vun de Schlüsselementer fir eng erfollegräich Zukunft vun eise Land duerstellen.

Aus deem Grond begréisst d'Fraktioun vun der Demokratescher Partei de virleiene Projet de loi, mat deem eis CRPe fir d'Zukunft fit gemaach ginn, ausdrécklech. Ech bréngen dann och heimadder den Accord vu menger Fraktioun zu dësem Text.

An éier ech zum Schluss kommen, wollt ech awer dem Rapporteur, dem Kollege Roger Negri, Merci soe fir säin detailléierte schrëfftlechen an ausféierleche mëndleche Rapport, deen et mir erlaabt huet, fir a menger Ried net méi op all Punkt vun dësem Projet de loi anzegoen, mä e bësse méi generell iwwert d'Wichtegkeet vun der Fuerschung hei zu Lëtzebuerg ze schwätzen.

Ech soen lech villmools Merci.

► **Plusieurs voix.** - Très bien!

► **M. Mars Di Bartolomeo, Président.** - Merci dem Här Bauler. Ech kréien esou lues e schlecht Gewëssen!

(**Hilarité**)

Wann ech dem Här Bauler nolauschten, dann hätte mer dem Här Negri nach e bësse méi Riedezäit misse ginn. Mä dat gesot, Geck an den Eck!

Nächste Riedner ass den Här Claude Adam fir déi gréng.

► **M. Claude Adam (déi gréng).** - Merci, Här President. An ech bueren dann nach e bësse weider un Ärem Gewëssen, ech fänken do un, wou de Kollege André Bauler opgehalen huet, ech soen dann natierlech och dem Roger Negri Merci. An effektiv, well hien esou ausféierlech war, souwuel a sengem schrëfftleche wéi och a sengem mëndleche Bericht, mécht en eis e bëssleche méi einfach, fir eben déi Punkten erauszegräifen, déi aus eiser Vue déi wichtigst sinn.

Déi zwee CRPen Tudor a Lippmann hu viru méi wéi zwéi Joer decidéiert, oder weinstens öffentliche decidéiert, zu engem Institut, dem LIST, ze fusionéieren. Dës Décisioun ass d'Resultat vun enger laanger Zesummenaarbecht, ville Planificatiounen an Diskussiounen. An et schéngt eis och eng Noutwendegkeet ze sinn, déi och kaum a Fro gestallt ka ginn.





Et ass logesch, datt zwou Fuerschungsinstitutioune, déi sech op Gebidder engagéieren, déi zwar net identesch sinn, déi awer eng ganz Rei Iwwerschneidungen a Beréierungspunkten hunn, zu der Konklusioun komm sinn, ze fusio-néieren. Dat ass e Schratt, dee soll derzou bäi-droen, méi effizient ze schaffen, méi visibel ze ginn, op europäeschem an op internationalem Plang.

Dat ass och e Schratt, an dat ass och schonn hei gesot ginn, deem am Aklang mat de Re-commandatioune vun der OECD hirer Analys vun eiser Fuerschungslandschaft steet. Do heescht et jo, ënner anerem, datt d'Koordinatioun tëschent deene verschiddenen Acteuren an awer och deene verschiddene Ministère misst verstärkt ginn an datt mer eis sollten op eng begrenzten Zuel vu Gebidder limitéieren a konzentréieren.

déi gréng begrëssen et, datt déi zwee CRPen zu engem méi grouse CRP zesummewuessen. A wann ee weess, wéi schwéier esou Prozesser bei eis am Ländchen heiansdo sinn, da kënn een och net derlaanscht, fir den Direkteren an de Conseils d'administration vun deenen zwee CRPen ze félicitéieren, datt se dee Schratt fäerdegbruecht hunn.

Datt mer déi zwee Nimm mat Historique Gabriel Lippmann an Henri Tudor elo opginn an duerch eng éischter banal Bezeichnung „Luxembourg Institute of Science and Technology“ verschwannen dinn, dat ass e bësse schued, mä dat huet awer seng Berechtigung, dat huet och d'Madame Hansen gesot. Mir probéiere jo - dat Gesetz hei geet jo wäit iwwert déi Fusioon vun deenen zwee CRPen eraus -, mir probéieren, eis CRP-Landschaft allgemeng méi visibel ze maachen am internationale Kontext. Si heeschen elo, zumindest op Englesch, an dat ass jo déi dominéierend Sprooch an der Recherche, alleguer „Luxembourg Institute of...“, an dann eben: „... Science and Technology“, „...Health“ oder „... Socio-Economic Research“.

Ech hu jo gesot, datt mer et begrëssen, datt déi zwee Institute zesummewuessen. Ech wëll awer och hei e puer Suergen zum Ausdrock bréngen, an ech wier frou, wann den Här Minister, den Här Statssekretär eis kéint e puer berouegend Äntwerte liwweren an deem Kontext.

Éischt Fro: Wéi ass et mam Zäitplang? Den 1. Januar gëtt et kee Lippmann a keen Tudor méi, nëmme méi e LIST. Dat ass schonn a ronn 75 Deeg! Mir wëssen nach ëmmer net, wien de Chef gëtt vun deem groussen neien Institut. A souwäit ech informéiert sinn, ass den Termin, wou Kandidaturen zougelooos waren, am Juni 2014 ofgelaf. Hunn d'Headhunteren hir Aarbecht nach net ofgeschloss? Wier et net och néideg, datt scho virun dem 1. Januar de CEO vum LIST géif säin Amt iwwerhuelen?

Eng zweet Fro: Den Zesummeschloss vun deenen zwee Institute erlaabt, an dat steet och am Projet de loi am Exposé des motifs, eng gewëss Rationalisatioun op enger ganzer Rei vu Gebidder: Deier Apparater mussen net zweemol kaaft ginn, de Fait, datt zwou verschidden Équippen u ganz ähnleche Projekte schaffen, gëtt ausgeschloss an Zukunft an och um Niveau vun der Administratioun gi Rationalisatiounen an Aussicht gestallt. Dat mécht alles Sënn. Mir schaffen hei mat Suen, déi hiren Ursprung an ëffentleche Gelder hunn. Et ass wichteg a richtig, rationell ze schaffen.

Et schéngt och esou ze sinn, datt eng Rei Leit elo nach an engem Beräich schaffen, deen an Zukunft keng Prioritéit méi huet. Et ass dat erklärt Zil, méiglechst keng Leit duerch d'Fusioun ofzebauen, an awer ass eng gewëssen Onsécherheet bei enger ganzer Rei Leit ze verspielen, déi an de CRPe schaffen.

Wier et net vläicht awer sënnvoll, mat de Beschäftegten zesummen e Sozialplang aus-schaffe fir déi Mataarbechter, déi net méi gebraucht ginn, oder gëtt et där Mataarbechter keng, déi net méi gebraucht ginn?

An en drëtten Punkt, iwwert dee mer eis och Gedanke maachen: Deen neie CRP-LIST kritt och eng nei hierarchesch Struktur, an ee Vir-worf, deen d'Uni schonn a verschiddenen Evaluatiounen gemaach kritt huet, deen taucht dann och bei de CRPen op: An dat ass déi intern Kommunikatioun.

Mengen Informatiounen no sinn eng Rei Mat-aarbechter net frou iwwert déi intern Kommunikatioun, oder déi feelend intern Kommunikatioun. Den Zefriddenheetsgrad bei de Mataarbechter ass am Allgemengen anscheinend net zum Beschten. D'Wëssensgesellschaft baue mer awer mat Wëssenschaftler, mat Mënschen op. An ech ginn dem Här Bauler ganz recht, wann e seet, datt mer och musse kucken, fir d'Fuerschungsberuffer attraktiv fir eis Jonk ze maachen, mä dat huet dann och eppes mat Aarbechtskonditiounen ze dinn.

Et ass och esou, datt am CRP Henri Tudor d'Zuel vun de Mataarbechter erofgaangen ass

an deene leschten zwee, dräi Joer. Datselwecht gëllt zum Deel fir de CEPS.

Sinn dem Ministère Donnéeën iwwert den Zefriddenheetsgrad vun de Mataarbechter bekannt?

Souwäit eis Froen an Iwwerleeungen zum CRP-LIST. Wéi scho gesot, den aktuelle Projet de loi geet wäit doriwwer eraus. Mat dësem Gesetz wëlle mer een allgemenge Kader setzen, dee fir all CRPen d'selwecht ass, also fir de LIST, de CRP-Santé an de CEPS. D'CRPe ginn iwwer e Gesetz als Établissements publics définiert, déi souwuel juristesche wéi finanziell wéi wëssenschaftlech an administrativ autonom funktionéieren.

Och wann ech net direkt déi grouss Gefor gësin, datt d'CRPen ze vill spezifesch Lëtzebuergesch kéinte ginn an datt dat hirer internationaler Renommée géif schueden, si mer natierlech dermat d'accord, datt si eng international Ausrichtung mussen hunn.

Et ass och gutt, datt déi allgemeng Missiounen vun de CRPen elo am Gesetz stinn. A mir sinn och d'accord mat den zousätzlechen a spezifische Missiounen, wéi se am Gesetzesprojet stinn.

Déi Verännerungen, wat de Conseil d'administration betrëfft, kënnen mer guttheeschen, an och de Fait, datt déi verschidde Ministère net méi an de Conseils d'administration vertruede sinn. An als Géigepartie fir deen Deal fanne mer et awer richtig, datt e Regierungsvertreeder mat Voix consultative bei de Réuniounen derbäi ass. Dat erlichtert d'Kommunikatioun tëschent CRP a Ministère. A wann dee Commissaire du Gouvernement seng Aarbecht gutt mécht, dann hëlleft dat och de CRPen, sech un déi geltend gesetzlech Regelen ze halen, a sief et nëmme bei dem Anhale vun de Regele bei Ausschreiwungen.

Datt d'Autonomie net méi esou wäit geet, datt d'CRPen d'Propriétaire vun de Gebäier ginn, fanne mer éischter eng gutt Léisung. Och bei der Uni schéngt sech d'Usicht duerchgesat ze hunn, datt si beim Propriétaireszenario net nëmme géif gewannen.

Mir mengen, datt mat dësen Neierungen kann dozou bäigedroe ginn, datt mer zu Lëtzebuerg zwee staark Pole vun der Recherche kréien: engersäits d'Uni, anerersäits eben d'CRPen. Datt och d'Zesummenaarbecht tëschent Uni a CRPe verbesserungswierdeg ass, datt ass en Dossier fir sech. Ee Problem an der Zesummenaarbecht schéngt schonn emol um Gebitt vun dem Opbau vun Doktorandeschoulen ze leien. Do kréie mer bestëmmt nach Geleeënheet, och doriwwer ze diskutéieren.

Am Rapport ginn nach e puer Froen vun de Beruffskummeren opgeworf, ouni allerdéngs beäntwert ze ginn. D'Chambre des Salariés freet, genee wéi de Statsrot, firwat datt dann net amplaz vun engem Comité de concertation ee Comité mixte gesat gi wier.

Interessant ass och déi Fro iwwert d'Droits d'auteur an d'Droits de propriété intellectuelle, déi d'Chambre des Salariés opwërf. Jo, mir sinn och der Meinung, datt d'Aarbecht vun den eenzelne Chercheuren et verdéngt, valoriséiert ze ginn. An et ass fir eis net direkt verständlech, firwat et een anere System op der Uni wéi bei de CRPe gëtt, wat dës Rechter betrëfft.

Eng ganz Rei Froen ginn am Rapport och zu der Integrated BioBank of Luxembourg, déi jo elo an de CRP-Santé integréiert gëtt, opgeworf. Ech wëll net de Résumé vum Rapport maachen, duerfir just meng Fro un de Minister: Funktionéiert d'IBBL zur Zefriddenheet? Sinn déi Hoffnungen a Suen, déi an dëse Projet gestach goufen, zu Ärer Zefriddenheet agesat ginn?

Här President, léif Kolleeginnen a Kolleegen, den Dossier Fuerschung ass voluminéis a wichteg. Mir hunn duerch déi enorm Geldzommen, déi mer hei investéieren, eng grouss Verantwortung. D'Uni an d'CRPe mussen engersäits kënnen autonom schaffen, anerersäits musse mir kënnen Rechenschaft ofleeën, ob déi Sue gutt investéiert sinn. Dat probéiere mer iwwert d'Contrats d'excellence (veuillez lire: d'Contrats de performance) an extern Evaluatioun sécherstellen. Mir sinn der Meinung, datt och eis Fuerschungs- an Héichschoullpolitik muss méiglechst transparent organiséiert sinn.

Mat dësem Gesetz maache mir e Schrëtt an déi richtig Richtung. Mir hu vill Problemer ugeschwat; anerer hu mer nach guer net touchéiert. Et gëtt jo nach divers aner Fuerschungszellen am Land, déi si vun dësem Gesetz net beréiert, ginn awer och vum Stat finanziéiert, zum Beispill de CVCE, an deem eng 40 Leit schaffen an iwwert dee mer och schonn ëfters an der Héichschoulkommisioun gschwatz hunn. Mir hunn een onofhängegt Institut fir Zäitgeschicht am Raum stoen.

Ech bréngen den Accord vun der grénger Fraktioun zum Projet 6527 a freeë mech iwwert déi

weider Diskussiounen iwwert déi wichteg Entwécklung vun eise Héichschoul- a Fuerschungssektor. Ee wichtege Termin ass eis viru Kuerzem vun der Regierung matgedeelt ginn: Den 13. Dezember 2014 sinn déi éischt Assises de la recherche. Do freeën ech mech schonn drop!

Ech soen Iech Merci fir Är Opmierksamkeet a bréngen selbstverständlech den Accord vun der grénger Fraktioun zu dësem Projet de loi.

► **Plusieurs voix.** - Très bien!

► **M. Mars Di Bartolomeo, Président.** - Merci och dem Här Adam. Nächsten ageschriwwene Riedner ass den Här Roy Reding.

► **M. Roy Reding (ADR).** - Merci, Här President. Léif Kolleegen: „Forschung strebt und ringt, ermüdend nie, nach dem Gesetz, dem Grund, Warum und Wie“, sot de Goethe. Ech mengen, de Kolleeg Bauler an och anerer, aner Virriedner, hunn hei op d'Wichtigkeet vun eiser eenzeger Ressource naturelle higewisen, déi mer hei am Land nach hunn, an dat ass d'Matière grise. An dofir si mir als ADR ganz d'accord mat Iech alleguerten, fir d'Wichtigkeet, d'Vitalitéit vun der Fuerschung fir eist Land ervirzeesträichen.

Mä ech hunn ee Problem, an Dir wësst dat, et ass eng Leier, dat ass den Artikel 7, et ass d'Quot am Verwaltungsrot. Ech géif Iech also bieten, wann Der d'accord sidd, wann ech deen néidege Support hei fannen, fir eis ze erlaben, e Vote séparé ze maachen iwwert den Artikel 7, well mer nach ëmmer der Meinung sinn - et huet nach kee Verfassungsrechtler mer de Contraire nogewisen -, datt déi Quot eiser Verfassung widderstpricht. A mir hunn eis décidéiert, kee Gesetz ze stëmmen, wat enger Verfassung widderstpricht.

Wann Der eis also géift erlaben, an engem Vote séparé den Artikel 7 ofzelehnen, da géife mer als ADR mat grousser Freed dat Gesetz do stëmmen.

Ech soen Iech Merci.

► **M. Mars Di Bartolomeo, Président.** - Merci och dem Här Reding. Nächste Riedner ass den Här Justin Turpel.

(Brouhaha)

► **M. Justin Turpel (déi Lénk).** - De Rapporteur seet, mat deem Projet de loi hei géife mer Weiche stellen. Ob mer se awer an déi richtig Richtung stellen, weess ech net, besonnesch, wann ee gesäit, datt dee Projet de loi sech hei areit an eng Strategie „Europa 2020“, déi selwer schonn opbaut op enger Lissabon-Strategie, déi e gehéieren Échec war a gescheitert ass, déi awer duerno weidergeschriwwen gëtt am „Europa 2020“.

Natierlech, natierlech ass et wichteg, méi an d'Fuerschung ze investéieren, wéi et gesot ginn ass, mä mat wéi enger Zilsatzung?

Mir investéieren zu Lëtzebuerg, wéi leider och op anere Plazen, ëmmer méi an d'Recherche appliqué, déi direkt soll Resultater bréngen. Ob d'Recherche appliqué awer dat ass, wat der Wëssenschaft am meeschten notzt, ass staark ëmstridden.

D'Recherche fondamentale dauert sécherlech vill méi laang wéi d'Recherche appliqué, déi en direkt Resultat sicht, sief et op wirtschaftlecher oder sozialer Ebene. Mä et ass déi, déi eis fundamental méi weiderbréngt, och wann dat mat Retard de Fall ass. Zum Beispill dem Einstein seng Relativitéitstheorie erlaabt eis haut, fir e GPS ze hunn. Den Einstein wousst sécherlech net, datt en d'Relativitéitstheorie géif fanne an a sécherlech och net, datt et eng Kéier e GPS géif ginn. Mä den Ennerscheed zwëschen der Recherche fondamentale an der Recherche appliqué ass sécherlech eng Diskussioun, déi méi seriö misst gefouert ginn, well an der Recherche fondamentale méi misst investéiert ginn an net ëmmer nëmme no kuerzfristegen Ziler soll gekuckt ginn.

Deen zweete Punkt, deen ech wëll opwerfen, ergëtt sech aus de Contrats de performance an där sougenannter „culture des résultats“. Dat léngt gutt, mä et muss een awer kucken, wat sech do hannendru verstoppt. Eng éischt Saach, déi sech hannendru verstoppt, ass en immensen Drock op d'Chercheuren, mat Konsequenzen fir hir Aarbechtsbedingungen, déi net ëmmer positiv si fir d'Recherche.

Eng zweet Saach, déi sech hannendru verstoppt, ass och zum Deel bei de Contrats de performance an der Culture des résultats eng Verkennung vum wëssenschaftleche Prozess. An de Contrats de performance heescht et ënner anerem, et misst een «Publications à facteur d'impact supérieur à 2» kréien. Also, ech verstinn, datt méi wéi zwou wëssenschaftlech Publikatiounen solle gemaach ginn, wat e Kritär ass, deen awer a Fuerschkreesser ganz staark ëmstridden ass.

Een drëtten Punkt, dee mer wëllen opwerfen, dat ass, wat sech ergëtt - a mäi Virriedner oder mäi Vir-Virriedner, de Claude Adam vun deene Gréngen, huet op eng Rei Punkten higewisen -, wat sech vu Problemer, Froen, Ängshten aus der Fusioon ergëtt vum Lippmann mam CRP Tudor. Et bestinn de Moment wierklech vill Ängshten bei de Mataarbechter, well se net wëssen, wat mat hinne geschitt. Am administrativen Beräich wäert sécherlech ofgebaut ginn, a ganz vill Leit hunn Ängscht, hir Tache ze verléieren. Am Virfeld hunn der och schonn eng Rei demissionéiert.

Och wa bei där Restrukturierung vläicht elo net esou vill Leit entlooss solle ginn, datt e Sozialplang muss ausgehandelt ginn, wéi dat vir-drin ugeschnidde ginn ass, esou wier et awer wichteg, datt mam Personal géif iwwert déi Restrukturierung do diskutéiert ginn an all hire Konsequenzen bis hin zum Volet Kommunikatioun.

Et stelle sech vill Froen, wat d'Salariéen ugeet, déi zum Beispill vun 2014 un - wéinst der Fusioon - keng Augmentatioun kritt hunn. Deemools hu se eng Biennale kritt, an duerno ass näischt méi geschitt.

Et stellt sech d'Fro zum Beispill: Ass virgesinn, datt am Règlement d'ordre intérieur d'Modalités de rémunération solle festgehale ginn? Et stellt sech d'Fro, ob dat net muss fir d'Éischt iwwer e Kollektivvertrag ausgehandelt ginn. Souwäit ech weess, ass d'Bestriewung do, fir e Kollektivvertrag auszuhandele fir d'Centre-de-recherchen. Wou si mer do drin? Dat géif mech ganz kloer, ganz konkret interesséieren.

De Problem ass deen, datt souguer mat mander Effektivitéit déi nämlech Objektivitéit bäibehale gi sinn. Dat heescht, datt d'Uspréich un d'Personal immens zougeholl hunn. Wéi gesäit dat an Zukunft aus?

D'Chambre des Salariés huet eng Rei Kriticken ubruecht, wouvunner eng positiv beäntwert ginn ass, nämlech déi, datt an de Conseil de concertation elo zwee Personalvertreeder drakommen. Et muss een awer wëssen, datt de Conseil de concertation ee konsultatiivt Gremium ass, an och, wa se effektiv e Stëmmrecht hunn, ass dat a leschter Instanz nëmme konsultativ. Par contre, de Vertreeder, de President vun der Personaledelegatioun, deen an de Conseil d'administration kënn, huet leider nëmme eng konsultativ Stëmm. An do stellt sech wierklech d'Fro, firwat datt net dee Comité mixte gemaach ginn ass, dee proposéiert ginn ass.

D'Fro stellt sech och par rapport zum Profil vum Generaldirekter, dee keen definéierte wëssenschaftleche Profil huet. Firwat? Aus wéi enge Kreesser soll dee rekrutéiert ginn?

An och bei den Droits d'auteur, wéi dat scho vir-drin ugeklungen ass, gëtt et Réckschrëtter. Mir hate bei der Uni d'Léisung, datt bei den Droits d'auteur 50% fir d'Uni sinn, 50% fir d'Chercheuren. Hei gëtt dat opgelooos a par défaut geet emol alles un de Centre de recherche.

Et kéint een nach eng ganz Rei aner Punkten opféieren, mä vu datt et jo keen esou ëmwerfende Problem ass, wat d'Interesse och heibanen ugeet, sinn ech frou, datt mer déi Froen do kënnen diskutéieren.

Ech wëll awer soen: Well mer net wëssen, wou deen Zuch do hift, wäerte mir eis beim Vote zum Projet enthalten. Trotzdeem waarden ech gespaant op d'Äntwerte vum Statssekretär op all déi Froen, déi hei opgeworf gi sinn.

Merci.

► **M. Mars Di Bartolomeo, Président.** - Merci och dem Här Turpel. D'Wuert huet dann d'Regierung, de Statssekretär Marc Hansen.

**Prise de position du Gouvernement**

► **M. Marc Hansen, Secrétaire d'État à l'Enseignement supérieur et à la Recherche.** - Här President, Dir Dammen an Dir Hären, ech géif natierlech och wëllen ufänke mat engem Merci un de Rapporteur, den Här Negri, dee mir natierlech och d'Aarbecht ofhëlt, fir nach eng Kéier dee ganzen Historique ze maachen. Deen ass perfekt gemaach gi vun dem Rapporteur, soudass ech dorobber net méi muss agoen.

An ech géif awer och e puer Mercie wëlle lassginn un alleguerten déi Leit, déi un deene Fusiounsprozesser do matgeschafft hunn. Dat sinn d'Mataarbechter natierlech vun de CRPen, dem CEPS an der BioBank, an natierlech och während Joren déi puer Leit, déi am Ministère ebe bei eis schaffen an déi sech intensiv an exemplaresch domadder befaasst hunn.

Ech géif awer an deem Historique och wëlle soen, dass dat heiten natierlech e Gesetzes-





projet ass, dee vun der Regierung virdrun an dem Här Biltgen déposéiert ginn ass, an dass natierlech bei allen hei, wéi ech dat och héieren, e grouss Konsens ass, fir iwwert deem dote Projet ze schwätzen. An ech mengen, da muss een och deejéinegen nach eng kéier ernimmen, deen deen dote Projet hei déposéiert huet, well et ass wierklech, esou wéi et och scho vun de Riedner a vun deene verschiddene Fraktiounen gesot ginn ass, e wichtege Projet fir de Fuerschungsstanduert Lëtzebuerg.

Ech géif e puer Wieder wëlle soen iwwert den aktuelle Kontext, an deem dat Ganz geschitt. Mir sinn eben 2014 amgaange gewiescht, all déi Contrats de performance an déi Contrats d'établissement mat der Uni ze ënnerschreien. Dat si véierjähreg Kontrakter, déi Objektiv an Ziler festleeën an natierlech och e ganze Koup u Moyenen deene verschiddenen Haiser zur Verfügung stellen. An do si mer bei 1,1 Milliarde fir déi véier nächst Joer, dat heescht eng Moyenne vun 275 Milliounen pro Joer. Dat weist, dass och déi aktuell Regierung e ganz wichtege Poids op d'Recherche an den Enseignement supérieur leet.

Par rapport zu der aktueller Situatioun geet dëst Gesetz awer och e Stéck méi wäit. Ech mengen, duerch déi zwou Fusiounen kréie mer an e puer Wochen natierlech ee ganz staarke Partner, deen neie Centre de recherche LIST, an natierlech och alleguerten déi aner Centre-de-recherchen, déi hei ernimmt goufen.

Mir kréien eng kritesch Mass. Mir sinn also méi staark opgestallt. Mir kréien eng international Ausrichtung an Attraktivitéit. An dat gëtt och am Moment ennermauert - an dat ass Aktualitéit - mat engem europäeschen Teaming-Projet, duerch deen d'Exzellenz vum zukünftige LIST soll eropgeschrauft ginn an iwwert dee mer och an deenen nächste Wochen nach bestëmmt wäerten eng kéier kënne schwätzen. An da wëlle mer natierlech och mat manner méi maachen. Dat heescht, mat deenen nämlechte Mëttele wëlle mer méi effikass a méi effizient ginn.

Ee Punkt, deen ervirgestrach gouf, dat ass natierlech déi 40%eg Quot fir den ënnerrepresentéierte Sexe, a mat de Regierungskommissäre wäerte mer et souguer warscheinlech an deem Kontext op d'Paritéit packen, soudass mer herno 5:5 wäerten hikréien, an ech mengen, dat wär jo dann och eng gutt Saach. An ech sinn awer och iwwerzeegt, d'Madame Hansen huet dat ugeschwat, dass mer awer och e ganze Koup Fraen an der Welt schaffen hunn, déi och vu Lëtzebuerg kommen, an deem dote Beräich, an déi alleguerten och wäerten hiren Apport bréngen, fir hei d'Fuerschung an deene Centre-de-recherchen do weiderzebréngen.

Dann, ouni Referendum brénge mer et fäerdeg, fir hei d'Verwaltungsgrëit op zwéi voll Mandat ze begrenzen, wat natierlech och eng wichteg Donne ass. An ech mengen, dat ass eben och ee Punkt, dee bestëmmt och dem Fuerschungssektor dann natierlech zegutt wäert kommen, wann och do a regelméissegem Ofstand nei Iddien an Innovatioun, Approchen op déi verschidde Centre-de-recherchen duerkommen.

Ee Wuert awer och nach iwwert dem Här Reding säin Optritt mat deene Punkten, déi hien ervirbruecht huet. Ech hätt mer et bal geduecht, dass Der natierlech net kéint domadder d'accord sinn.

Ech war awer ganz paff, well et gëtt awer ee kleng Changeement par rapport zu Ärer Position zum FNR. Wann ech mech net iren, hat Der do de Rapport och net ugehall an der Chamberskommissioun, an deen hat Der hei awer ugehall, soudass ech haut e bëssen iwwerrascht sinn, dass Der hei awer natierlech dann net méi den Accord gitt vun dem ADR hei op dëser Plaz.

### (Interruption)

Et ass gutt. Mä de Rapport hat Der do awer op d'mannst gestëmmt, an dat war natierlech schonn e bëssen anescht wéi dat, wat Der nach beim FNR gemaach hutt. Dofir war ech e bëssen optimistes, dass Der dat kéint och hei droen, wat fir de Fuerschungsstanduert natierlech eng gutt Saach gewiescht wär. Mä ech mengen, mir kommen awer virun, an dat ass jo dat Wichtigst um Enn vun dëser Debatt.

2015 gëtt dann och ganz interessant fir d'Fuerschung. E groussen Deel vun der Fuerschung an der Innovatioun plënnert op Belval. Do bidde mer dann och fir d'éischte kéier ganz adaptéiert Raimlechteken, souwuel de Fuerscher wéi awer och der Uni; dat gëtt e Qualitéitssprong an awer och en Attraktivitéitszuschlag, dee mer bis elo nach net haten.

Mir hunn 2015 dann awer och d'Présidence, an do kënne mer och op EU-Niveau Schwéierpunkte setzen a ganz interessanten Dossier. An da gouf natierlech och bei de pluriannuelle Kontrakter vun der Uni an de Centre-de-recherchen eng Revisiounsklausel fir Enn 2015 agebaut, déi et dann erméiglecht, fir och gewësse Parameteren ze ajustéieren a punktuell a gewëssene Beräicher nozebesseren. Mir wäerten do dann, an dat ass och ugeschwat ginn, verstärkt op d'Kooperatioun an d'Koordinatioun zwëschen Uni an de Fuerschungsinstituter setzen an dat dann natierlech och an e puer weinegen Domänen duerch international Partner verstärken, wat der ganzer Saach natierlech och nëmme kann hëllefen.

Mir musse längerfristeg awer och der Uni an de Fuerschungsinstituter nach eng kéier un d'Häerz leeën, hir europäesch Präsenz däitlech ze verbessern an hir Fuerschungsexzellenz weider eropzeschrauwen.

Beim Output vun der ëffentlecher Fuerschung ass och nach vill Loft no uewen. An do zielen ech awer och op d'Mathëllef vun de Verrieder vun den Entrepreneuren, déi och an Zukunft verstärkt an de Verwaltungsgrëit vun de Fuerschungsinstituter setzen.

Den 13. Dezember hu mer dann och d'Assises de la recherche. Dat huet den Här Adam och ervirgestrach. Ech mengen, do sidd Der alleguerten - d'Memberen aus der Commissioun - och invitéiert a mir erwaarden eis och vill, dass do vill iwwer Koordinatioun a Kollaboratioun zwëschen den Instituter an der Uni debattéiert gëtt an dass mer och domadder weiderkommen.

Dann hu mer och Enn '14, Ufank '15 d'Evaluatioun vun der OECD, déi op eis zoukënn. An ech ginn dervun aus, dass mer da souwuel no den Assis wéi no där Evaluatioun d'nächst Joer kënne weider Schrëtt ënnerhuelen, fir d'Fuerschung an den Enseignement supérieur awer och weiderzebréngen hei an deem Land.

E puer Äntwerten awer och nach op déi Froen, déi gestallt goufen. Den Här Adam an den Här Negri hate relativ ähnlech gelagert Bemierunge gemaach a Froen, wat den Zäitplang ugeet. De CEO, deen ass amgaang gesicht ze ginn. Do si mer an der Schlussphas an ech ginn dervun aus, dass mer Ufank Dezember de CEO wäerten hunn.

Et kann een op där anerer Säit awer soen, dass mer mat dem Här Reinig a mat dem Här Lemmer och de CEO an de strategeschen Innovationschef schonn emol am Haus hunn. Mat dem Här Jean Luc Pitsch hu mer e Finanz- an administrative Chef, a mir hunn och eng nei Ressource-humaine-Cheftaine, dat ass d'Madame Barbara Ditzler. Déi si schonn am Amt zënter Kuerzem an déi schaffen awer och schonn intensiv un där Problematik, déi Der hei ernimmt hutt, wat d'intern Kommunikatioun ass. An dat ass jo och eppes, wat an deem dote Kontext wichteg ass.

Et ass op dëser Plaz, mengen ech, wichteg ze ënnersträichen, dass et sécher e bëssen Opreegung gëtt virun esou enger Fusioun. Dat ass normal. Dat hutt Der ganz korrekt, och den Här Turpel, natierlech illustriert. Ech ginn awer elo emol dervun aus, dass mer nach net solle vu Sozialplang schwätzen. Et ass vun eiser Säit erwünscht, dass déi Leit esou gutt wéi méiglech alleguerten an deem neie LIST och regroupéiert bleiwen, dass do deen een oder anere Réalignement wäert derbäikommen, wou Leit och emol vläicht hir Prioritéite mussen de Prioritéiten upassen. Dat ass selbstverständlech.

Et ginn och keng esou Fusiounen, ouni dass Spéin falen an dass dat fir Opreegung suergt. Dat ass och normal. Mä mir hunn och an deene leschte Wochen a Méint an de Conseils d'administration, wou jo elo nach Verrieder vun de Ministère sinn, insistéiert, dass deen dote Volet mat där néideger Sensibilitéit ugepaakt gëtt an dass dorobber opgepasst gëtt.

Mir hunn an der Chamberskommissioun och versprochen, wéi mer d'leschte kéier eng kéier kuerz doriwwer geschwat hunn, dass mer an engen néng Méint eng kéier zrëckkommen an d'Chamberskommissioun, fir doriwwer ze schwätzen, wou mer an deem dote Kontext dru sinn. Well et ass natierlech elo esou, an enger éischter Phas wäert ganz vill Aarbecht uleien, och an deenen éischte Méint vun deem neie Joer, wou natierlech och déi administrativ Persounen alleguerten nach eng kéier wäerten intensiv missen un där Fusioun, och iwwert den 1. Januar ewech, schaffen. An da muss mer natierlech eng kéier de Bilan maachen, wou mer dru sinn a wat dee Moment alles geschitt ass.

Mä et läit eis och als Regierung drun, well et och am Virfeld ëmmer vun där Regierung virdru betount ginn ass, dass mir dat och iwwerhuelen, dass mer kucken, fir dass déi Leit alleguerten esou gutt wéi méiglech kënne mat op de Wee geholl ginn. Et muss natierlech jidd-

weree sech an engem Fuerschungsmilieu e bëssen a Fro stellen an da muss mer um Enn vun deem Prozess eng kéier de Bilan maachen, wou mer dru sinn. Dat hu mer ofgemaach. A mir kommen natierlech och do eng kéier an d'Chamberskommissioun, fir doriwwer ze schwätzen.

De Comité de concertation ass ugeschwat ginn. Deen ass agesat, dat hate mer lech jo och an der Chamberskommissioun als Erklärung ginn, mat Personaldelegéierten dran. De Comité mixte gouf opgeworf. Ech mengen, deen ass am Moment an engem anere Projet de loi iwwert den Dialogue social souwisou am Gespréich, an der Diskussioun, soudass mer deen elo hei net instauréiert hunn.

De Kollektivvertrag, déi Fro ass gestallt ginn. Déi Diskussioun ass bis no der Fusioun verreckelt ginn, fir doriwwer eng kéier ze diskutéieren, soudass déi dote Punkten, mengen ech, eng kéier alleguerten an Zukunft nach kënne ernimmt ginn. An ech hoffen, dass domadder e puer Äntwerten op déi Froe konnte geliwwert ginn, déi Der hei gestallt hutt.

Den Här Bauler huet a senger Interventioun nach iwwert d'Culture scientifique geschwat. Do kann ech lech just soen, dass och genee dat, wéi Der et ernimmt hutt, am Moment relativ gutt méiglech ass. Mir hu jo déi zwéi Ministèren, d'Éducation nationale an den Enseignement supérieur, ënnert darselwechter Tutelle a mir hunn notament mat dem FNR, deen dat jo och als Missioun huet, Gespréicher ugefaangen, fir iwwert déi Culture scientifique ze schwätzen, wéi een déi schonn an dem Fondamental an och an dem Secondaire ka verstärkt abréngen, fir dass mer och hei zu Lëtzebuerg jonk Leit kënne begeeschteren. Et schaffe vill Leit an deem heite Beräich, et si grouss Moyenen do, an da soll een natierlech och déi Leit, déi hei zu Lëtzebuerg wunnen, fir dee Beräich begeeschteren.

Op jidde Fall sinn ech frou fir déi grouss Zoustëmmung, déi et hei gëtt, an ech sinn och zefridden, dass mer dee Projet elo kënne stëmmen, deen de Fuerschungsstanduert op jidde Fall wäert weiderbréngen. An da muss mer natierlech eng kéier doriwwer eraus kucken: Wou geet de Fuerschungsstanduert hin? Mir hunn elo eng Fusioun gemaach. Wat muss mer nach an deenen nächste Méint alles vläicht eng kéier thematiséieren? Do ginn et och e ganze Koup u Plattformen, wou mer sollen nach verstärkt och iwwer e weidert Zesummeleeën diskutéieren, fir dass mer déi Suen, déi jo awer relativ intensiv hei investéiert ginn, och esou gutt wéi méiglech kënnen asetzen.

Ech soen lech Merci.

### ► Plusieurs voix.- Très bien!

► **M. Mars Di Bartolomeo, Président.**- Merci och dem Här Statssekretär. Domat si mer um Enn vun eisen Diskussiounen ukomm a mer kéinten zur Ofstëmmung iwwergoen.

Hei ass vun engem vun den Deputéierten de Vote par division gefrot ginn. Den Artikel 45 vun eiem Règlement seet: «La division est de droit, lorsqu'elle est demandée. L'auteur de la demande doit préciser les parties sur lesquelles il demande des votes séparés.» Dat ass geschitt. «Pour être recevable, la demande doit être appuyée par cinq députés.»

Ech géif froen, ob déi Demande vu fënnef Deputéierten ënnerstëtzt ass. Den Här Turpel.

► **M. Justin Turpel (déi Lénk).**- Merci, Här President. Ech sinn natierlech iwwerhaapt net d'accord mat deem, wat den ADR do fret. Mä dat brauch ech net hei ze betounen. Mä et muss awer d'Recht si vun all Deputéierten, fir kënnen e Vote séparé ze froen iwwer een Artikel. Dofir ënnerstëtze mir de Vote séparé vun deem Artikel a wiere frou, wann dat och prinzipiell emol kéint geregelt ginn.

Well de Moment, dat ass eng Diskussioun iwwert d'Verfassung, wou dat an der Verfassung de Moment drasteet. A mir wiere frou, wann eigentlech all Parteien, och d'CSV, d'accord wieren, fir dat an der Verfassung esou ze änneren, datt mer d'Recht vun all Deputéierten hunn, fir kënnen e Vote séparé zu engem Artikel ze froen, well dat einfach e wichtegt elementaart Recht muss si vun engem Deputéierten, fir Meenungsfräiheet kënnen hei auszedrecken.

### ► Une voix.- Très bien!

► **M. Justin Turpel (déi Lénk).**- Also mir ënnerstëtzen dat an deem do Fall, och wa mer mam Inhalt net d'accord sinn, an hoffen, datt mer dee Problem do deemnächst geregelt kréien.

Merci.

► **M. Mars Di Bartolomeo, Président.**- Majo, da ginn ech dovunner aus, dass den Här Urbany an den Här Turpel d'Demande vum Här Reding ënnerstëtzen an dass deem seng zwéi Kolleegen dat och maachen, soudass mer géi-

fen e Vote iwwert den Artikel 7 vun dem Gesetzesprojet lancéieren.

### Vote séparé sur l'article 7 du projet de loi 6527

Wie mat der Demande vum Här Reding d'accord ass, stëmmt...

► **M. Gast Gibéryen (ADR).**- Mir stëmmen iwwert den Artikel of.

► **M. Mars Di Bartolomeo, Président.**- Jo, mat der Demande iwwert den Artikel, selbstverständlech. Dann dréie mer et ëm. Wie mat deem Artikel, esou wéi e formuléiert ass, d'accord ass, dee stëmmt mat Jo. An deen, deen dergéint ass, dee stëmmt mat Nee.

De Vote ass lancéiert. D'Procuratiounen. Ech ginn dervun aus, dass de Vote ofgeschloss ass.

Ofgestëmmt hu 55 Membere vun der Chamber. Dovun hunn der 52 fir den Text, esou wéi en am Projet de loi virgesinn ass, an 3 dergéint gestëmmt. Dat heescht, den Artikel ass an där Form, wéi en am Projet ass, acceptéiert.

Ont voté oui: Mmes Diane Adehm, Sylvie Andrich-Duval, Nancy Arendt, MM. Emile Eicher, Félix Eischen, Léon Gloden, Jean-Marie Halsdorf, Mmes Martine Hansen, Françoise Hetto-Gaasch, MM. Aly Kaes, Marc Lies, Paul-Henri Meyers, Mme Octavie Modert, MM. Laurent Mosar, Gilles Roth, Marco Schank, Marc Spautz et Claude Wiseler;

MM. Marc Angel, Frank Arndt (par M. Alex Bodry), Alex Bodry, Mmes Taina Bofferding, Tess Burton, M. Yves Cruchten (par M. Roger Negri), Mme Claudia Dall'Agnol, MM. Mars Di Bartolomeo, Georges Engel, Franz Fayot (par Mme Tess Burton), Claude Haagen, Mme Cécile Hemmen et M. Roger Negri;

MM. Guy Arendt, André Bauler, Gilles Baum, Mme Simone Beissel, M. Eugène Berger, Mme Anne Brasseur, M. Lex Delles, Mme Joëlle Elvinger, MM. Gusty Graas, Max Hahn, Alexander Krieps, Edy Mertens (par M. Eugène Berger) et Mme Lydie Polfer (par M. André Bauler);

MM. Claude Adam, Gérard Anzia, Henri Kox, Mmes Josée Lorsché, Viviane Loschetter et M. Roberto Traversini;

MM. Justin Turpel et Serge Urbany.

Ont voté non: MM. Gast Gibéryen, Fernand Kartheiser et Roy Reding.

An da géife mer direkt iwwergoen zu der Ofstëmmung iwwert den Ensembl vum Projet de loi 6527.

### Vote sur l'ensemble du projet de loi 6527 et dispense du second vote constitutionnel

De Vote fänkt un. D'Procuratiounen. An d'Ofstëmmung ass eriwwer.

De Projet de loi 6527 ass mat 56 Jo-Stëmmen, bei 2 Enthaltungen ugehall.

Ont voté oui: Mmes Diane Adehm, Sylvie Andrich-Duval, Nancy Arendt, MM. Emile Eicher, Félix Eischen, Léon Gloden, Jean-Marie Halsdorf, Mmes Martine Hansen, Françoise Hetto-Gaasch, MM. Jean-Claude Juncker (par Mme Nancy Arendt), Aly Kaes, Marc Lies, Mme Martine Mergen (par Mme Octavie Modert), M. Paul-Henri Meyers, Mme Octavie Modert, MM. Laurent Mosar, Marcel Oberweis (par M. Laurent Mosar), Gilles Roth, Marco Schank, Marc Spautz et Claude Wiseler;

MM. Marc Angel, Frank Arndt (par M. Alex Bodry), Alex Bodry, Mmes Taina Bofferding, Tess Burton, M. Yves Cruchten (par Mme Cécile Hemmen), Mme Claudia Dall'Agnol, MM. Mars Di Bartolomeo, Georges Engel, Franz Fayot (par Mme Claudia Dall'Agnol), Claude Haagen, Mme Cécile Hemmen et M. Roger Negri;

MM. Guy Arendt, André Bauler, Gilles Baum, Mme Simone Beissel, M. Eugène Berger, Mme Anne Brasseur, M. Lex Delles, Mme Joëlle Elvinger, MM. Gusty Graas, Max Hahn, Alexander Krieps, Edy Mertens (par M. André Bauler) et Mme Lydie Polfer (par M. Gusty Graas);

MM. Claude Adam, Gérard Anzia, Henri Kox, Mmes Josée Lorsché, Viviane Loschetter et M. Roberto Traversini;

MM. Gast Gibéryen, Fernand Kartheiser et Roy Reding.

Se sont abstenus: MM. Justin Turpel et Serge Urbany.

Ech ginn dervun aus, dass déi Enthaltungen zur Genüge motivéiert sinn. Ech froen lech da just nach, ob Der dermat d'accord sidd, fir de Projet vum zweete verfassungsméisseg Vote ze befreien. Ass dat esou?

### (Assentiment)

Dann ass dat esou décidéiert. Merci.

Mir géifen dann zum nächste Projet iwwergoen. Dat ass de Projet de loi 6679 iwwert de Financement vum Max-Planck-Institut Lëtzebuerg. D'Riedezäit ass nom Basismodell festgehalten. Den Här Rapporteur André Bauler huet direkt d'Wuert. Här Bauler.